

بائع الحلوي

داليا غنيم - بائع الحلوي ، رواية

ISBN : 978-977-798-106-4

رقم الإيداع : ٢٠١٧/٢٩١٨

إن دار الحلم للنشر والتوزيع غير مسئولة عن آراء المؤلف وأفكاره ، وتعتبر الآراء الواردة في هذا الكتاب عن آراء المؤلف ، ولا تعبر بالضرورة عن آراء الدار
جميع حقوق الطبع والنشر محفوظة للدار
ولا يجوز طبع أو إعادة استخدام أي جزء من العمل في أي صورة كانت
إلا بموجب موافقه خطيه من الناشر



© دار الحلم للنشر والتوزيع

عضو اتحاد الناشرين المصريين

القاهرة - جمهورية مصر العربية

Mob : 00201141824562

dar_el7elm@hotmail com

info darel7elm@Gmail com

بائع الحلوي

رواية

داليا غنيم



الى مالكي
أحببتك
وأحبك
وسأظل..

أنت وحدك بائع حلوتي وصانع بهجتي

بائع الحلوى

((عندما يعشق الشيطان))

دفاتر عمرک هيا احرقیها
فقد ضاع عمرک مثلی سدی
أریدک عمری ولو ساعه
فلن ینفع العمر طول المدی
ولو ان ابلیس یوما رأی
لقبل عینیکی ثم اهتدی

فاروق جویده

وقف فتحي ذو السابعة عشر ربيعا أمام فتحة الفرن الذي يعمل به منذ ٥ سنوات يتأمل النار المشتعلة أمامه ينظر لها متعجبا لا يدري أيحبها أم يكرهها.. هل هي أنانية تلتهم كل شيء لتحيا هي أم أنها تخلصنا من أشياء لا بد لها أن تحرق وتختفى للأبد ..

كثيرا ما كان الحاج عبد الحميد صاحب المخبز يعنف فتحي عندما يجده ساهما ناسيا الخبز يحترق وأحيانا أخرى يربت على كتفه بحنو ابوى فهو يعرف جيدا السبب وراء ذلك .. لم ينسى فتحي للحظة واحدة منظر أمه عندما اخرجها الجيران جثة متفحمة من غرفتها مشهد الدخان وهو يتصاعد من جسدها لم يفارق خياله للحظة ..

انتبه فتحي من شروده على صوت الحاج عبد الحميد وهو يربت على كتفه : انت مش هتنسى بقى يابنى؟
انسى ايه يا حاج؟

الحريقة والست جميلة الله يرحمها .. يابنى دى أكيد فى الجنة دلوقتى .. ادعيها يا ابنى ..

هز فتحي رأسه مكتفيا بابتسامة باردة ورد مقتضب:

- حاضر يا حاج هدعيها ... وطبعا لن يفعل

عاد فتحي لشروده مرة أخرى ومر أمامه شريط الأحداث كاملا طفل صغيرا ليس له متعة في الحياة إلا لعب الكرة مع أصدقائه وشراء الحلوى من عم مصطفى الرجل العجوز الذى يمر يوميا كل يشتري منه قطعة الحلوى ويجلس يلتهمها متمنيا أن تكون مئات القطع أو ان يكون ابنا لصاحب المصنع ليأكل منها كيفما يشاء ولكن ماذا يفعل وهم فقراء وليس مسموحا له غير بقطعة واحدة في اليوم ..

استيقظ من نومه على صوت زمارة عم مصطفى معلنا قدوم السعادة.. انتفض فتحي من فراشه وركض على غرفة أمه ليوقظها لتعطيها المال ..

- أمه أمه عم مصطفى جه هاتى نص جنيه ..

أمه أمه

بدون أن تدير جميلة ظهرها أجابته بصوت خافت :

- روح يافتحى ممعيش فلوس

- والنبي يا أمه عم مصطفى هيمشى

- قولتلك غور مفيش زفت

لم تكن جميلة ذات الثامنة والثلاثين عاما معتادة أن تعامل أولادها بهذه القسوة بل كانت رحيمة عطوفة معهم دائما ولكن ماذا تفعل بعد لقاء فاشل مع زوجها.. لقاء أشعل نيرانا ولم يطفئها، لم تكن تلك المرة الأولى فمنذ سنوات وهى محرومة من حقوق أنوثتها بسبب ضعف زوجها... ولأنها امرأة ولأنها شرقية ولأنها فقيرة تسكن فى حى شعبي لم يكن من حقها أن تتكلم فى هذا الأمر حتى مع نفسها بل بمرور الأيام روضت

نفسها وأقنعتها أن ذلك حال الجميع وليس لها إلا أن تصبر
وتتحمل مكنتيه بوجود أولادها حولها ..

نهضت جميلة بصعوبة من الفراش ونظرت لنفسها في المرآه
القديمة المعلقة على الحائط بجوار النافذه حاولت أن تتبين
ملامحها بين شروخ المرآه مازالت جميلة بعينها الواسعتين
وبشرتها البيضاء وشعرها الأسود الطويل ..
وضعت يدها في خصرها تتأمل جسدها الممشوق ..

تذكرت جميلة كيف كانت حلم يراود جميع الشباب حينما
بلغت ودخلت مصاف النساء .. استدارت وتأملت نفسها
مرة أخرى لم تغير السنوات شيئاً إلا بعض الخطوط الصغيرة
في وجهها تخبرها أن العمر يمر ما تغير في جميلة هو قلبها
وروحها أصابتهما الشيخوخة

انتبهت من شرودها ونفضت عن نفسها تلك الوسواس عقدت
المنديل بإحكام على رأسها وجبهتها وعادت لنفسها ..

- هدى قومي يا بنتى هتأخري على شغلك

- أنا صاحية يا أمه صباح الخير

- طيب جهزي الفطار لاختاتك على ما اغسل وشي

- حاضر يامه

هدى فتاة جميلة كأمها أخذت منها أيضا هدونها وسكونها لم
تكمل العشرين ربيعا ولكنها تشعر دائما أنها الأخت الصغرى
لأمها تساعدها في كل شيء ... دائما طوع يديها تنتظر أول كل
شهر لتركض وتعطى أمها راتبها كله مكنتيه بأن ترى ابتسامتها
الباهتة... تمنى يوما أن تسألها عن سر حزنها وصمتها الدائم

لكنها أبداً لم تتجراً..

نظرت جميلة لابنها سمير الممدد على الكنبه في الصالة... سمير هو أيضاً خنجر مغروس في قلبها وروحها ... شاب في العشرين من عمره أسمر البشرة أجعد الشعر، حرم منذ صغره من أى مسحه جمال بجانب تلك اللدغه اللعينة التي تعتريه أغلب الوقت وكثيراً ما جعلته يركض لأمه باكيا وهو صغير شاكيا لها من أصدقائه الذين يعايرونه مرة بسمار بشرته ومرة لأنهم لا يفقهون ما يقول فتخبره بأنهم كاذبين وأنه أجمل منهم جميعا وكثيراً ما كانت تغنى له الأغاني التي تتحدث عن جمال ذوى البشرة السمراء .. يصدقها مرات فيفرح ويضحك بصخب ومرات أخرى يستمر بالبكاء بدون دموع حتى نشأ منطويا ليس له أصدقاء ..دائم الوحدة والصمت . نظرت له جميلة بشفقة قبل أن تربت على كتفه لتوقظه ..

- سمير قوم يا حبيبي افطر معنا عشان تروح شغلك

- مليش نفس يامه انا هنزل على طول

وهم أن ينهض ليذهب لعمله في قهوه المعلم سماحة :

مش هتنزل إلا لما تفطر متوجعش قلبي يا بنى كل يوم

وكعادته كل يوم لم يخالف سمير أمر أمه:

- حاضر

جلسوا جميعا حول الطبلية لتناول الافطار لاحظت جميلة

عبوس ابنها فتحي فاحتضنته بقوة قائلة :

- متزعلش بكرة هديلك جنيه تشتري اتنين مش واحده

- أما نشوف ..أجابها وهو مازال عابساً

نظرت جميلة بحنو لأولادها الثلاثة وهم يأكلون وتناست بل
ولامت نفسها على ما كانت تفكر به قبل ساعة مرددة في
نفسها
كفاية ولادى عليا ..

لم ينتبه أحد كالعادة لعدم وجود عبده فهو غير موجود إلا
بجسده فقط غير مدرك لما يدور حوله لا يعرف شئ غير
أقراصه المخدرة التي أدمنها منذ سنوات يتظاهر بالنوم أغلب
الوقت لكي يتحاشى نظرات أولاده له يشعر بكرههم له طوال
الوقت ولما لا وقد تبدلت الأدوار فيما بينهم فأصبح هو من
يتسول منهم المال أول كل شهر ..

أما هدى فهي تختلس جزءا من راتبها كل شهر وتعطيه له
بدون علم أمها وهو أيضاً من أجبر فتحي على ترك المدرسة
لعدم توافر المال اللازم للتعليم .

حملت هدى الأطباق للمطبخ وهمت بغسلها :

- سيببهم يا بنتى انا هغسلهم روحى انت علي شغلك

- لا يا امه ارتاحى انتى انا هخلصهم واروح لسه بدرى عاوزه

حاجه اجيبها لك معايا وانا راجعه

- اه عدى ع دكان عمك على هاتيلى شويه زراير حمرا وكام

بكره خيط اخلص الكام فستان دول واسلمهم لاصحابهم

- حاضر يامه من عنيا

بعد أن تاكدت هدى من انشغال أمها بتجهيز قطع القماش في

غرفتها وضعت بعض الفول المتبقى في نصف رغيف وذهبت

لتوقظ أباه المستلقى على الكنبه:

- آبه آبه صباح الخير
- فتح الأب عيونه بصعوبة : إيه يا بت عاوزه ايه ؟
- خد الساندوتش ده افطر أصلك كنت نايم ومرضناش نصحيك
- قالتها هدى بصوت منخفض حتى لا تسمعها أمها :
- هو انتوا حسين بيا أصلا يا ولاد الكلب كل حاجه أمكم أمكم
- تاكلوا مع أمكم تقعدوا مع أمكم زي ماكون مت خلاص
- لا والله يا آبه احنا مرضناش نصحيك بس ، خد الساندوتش
- وانا هعملك كوبايه شاي ..
- هاتي محدش حاسس بيا ف البيت ده كله غيرك
- متقولش كده ياآبه ربنا يخليك لينا
- ارتدت هدى ملابسها مسرعه ونزلت لعملها لمحت أخواها
- فتحي أمام البيت فأشارت له مودعة..
- سلام يا فتحي
- هاتيلي معاكى حاجة حلوة بالليل
- ماشى وانطلقت
- في طريقها مرت على قهوة المعلم سماحة رأت سمير منهمك
- في عمله رفعت رأسها لأعلى لمحته في الشرفة ينتظر مرورها
- فأشارت له بعينها أن يلحقها ..
- عدل أحمد طالب كلية الحقوق ملابسه بسرعة ولملم دفاتره
- وكتبه وهم بالانصراف..
- اممم معاد كل يوم ؟ تمتمت أمه
- امرأة ريفية عجوز لكن مكرها ودهاءها جعلها تدرك حالة
- العشق التي يعيشها ابنها الوحيد ..

معاد ايه يامى؟

الست هدى هى الشهاده لله بنت حلال ومؤدبه بس دانت
يا ابنى فى الجامعه معجبكش ولا بت من زملاتك
شعر أحمد أنه لا مفر من ان يخبر أمه
بصراحة يا أمى انا مش شايف غير هدى وان شاء الله
اتقدملها لما اخلص ..

- ايوه يا ابنى بس دى مكملتش علامها واخوها صبي قهو....

قاطعها أحمد منها الحديث :

-انا عارف كل ظروفها كويس يا أمى ومش فارق معايا ، سلام
بقى يا أمى أنا اتأخرت ..

-ربنا معاك يا ضنايا ابقى سلم عليها

بعيدا عن عيون المراقبين وفضول المعجبين ووقت هدى تنتظر
أحمد وتتخيل كيف سيكون اللقاء هذه المرة.. رتيا ومملا
كسابقه أم أنه سيفاجئها بكلمة أحبك هذه المرة؟ هل
سيمسك يدها؟ هل سيحتضنها؟ ربما يقبلها مثلما تشاهد فى
الأفلام القديمة وتحكى لها زميلاتها فى المشغل الذى تعمل به؟
أم سيكتفى بسؤالها عن اخبارها وأخبار عملها وأسرتها؟

كثيرا ما تساءلت بينها وبين نفسها عن نوعيه هذا الحب
كيف يحبها ولا يشتهيها؟ ألا يشعر بما تشعر هى به؟ ربما لا
يراهها جميلة؟ لا يمكن فجمالها حديث الجميع فى الحى ربما
يجب ان...)

-ايه السرحان ده كله يا هدى؟

-انتبهت لصوته ولا حاجه اتأخرت ليه؟

-مفيش على ما لبست انتى عامله ايه؟
 -كويسة الدنيا حر أوى
 -اه فعلا أجابها بهدوء
 -انا هخلع الطرحة دى شوية وهمت بخلع حجابها قليلا
 فقطاعها جازبا يدها..
 -لا شعرك هيبان
 فتلامست أيديهما لأول مرة..
 -آسف مكنش قصدى
 -آسف على ايه ؟ سألته بامتعاض حاولت اخفاءه:
 -انى لمست إيدك
 -هو انت يعنى مبتسلمش على البنات زمايلك فى الجامعة
 -طبعا بسلم عليهم بس انتى لأ ..
 ليه بقى؟ سألته باستنكار:
 -عشان مش عاوز أى حاجة بينا تغضب ربنا عشان ربنا
 يباركلى فيكى وفى أولادنا وبعدين أنا نفسى أمسك ايدك
 واسرحلك شعرك كمان بس لازم نصبر لحد مانتجوز ..
 - آآه طبعا لما نتجوز أجابته بضيق ..
 لم يكن أحمد يكذب فيما قاله فهو يحبها حبا شديدا ...
 ويشتهيها هو أيضاً ولكنه يريد لها ابنته قبل أن تكون أنثاه ...
 يريد لها بطريقته يحرمها على نفسه حتى تظل نقية طاهرة ...
 وبعد زواجهم سيعلمها هو كيف تكون أنثى.. أنثى له وحده .
 افترقا .. هو ذاهب للجامعة مزهوا بدور الراهب الذى اتقنه
 فخورا أن يوما آخر مضي .. وقد حافظ فيه على هداه..

عبرت هى الشارع فى طريقها لعملها غاضبه منه كعادتها
تذكرت أول حديث مر بينهم حينما استوقفها ووجهه يتصبب
عرقا وانفاسه تختلج فى صدره ثم تحجج بالسؤال عن أخيها
فتحي وأسباب خروجه من المدرسة وعندما همت بالذهاب
أخرج ما فى قلبه دفعه واحده ..

قالها وكأنها حمل يريد التخلص منه..

هدى أنا معجب بيكى و بحبك وعاوز اتجوزك أول لما أخلص
دراسة ..

قالها جملة واحده بلا فواصل كأنه خاف أن ينسى شيئا منها ..
قالها بلا رغبه أو إحساس أو حتى نظرة اشتها .

انهمك سمير في توصيل الطلبات الى زبائن المقهى ثم فجأة توقف كل الصخب من حوله لم يعد سمير يسمع صوت أحجار الطاولة ونداءات الزبائن لم يعد يسمع شيئاً إلا صوت ضحكة يميزها جيداً..

إنها ورد ابنة عم حسين فتاة في السادسة عشر من عمرها ليست جميلة وهى تعلم ذلك ولكنها أيضاً تعلم كيف تكون أنثى تعلم كيف تتصنع الجمال بالعطر الذى يسبقها أينما ذهبت ومساحيق التجميل التي لا تفارق وجهها والتمايل ذات اليمين وذات اليسار وبالضحكات الرنانة..

- شوفي الواد سمير هيكلك بعنيه ازاي همست فيفى
- يا ختى مانا عارفة ماهو كل ما يشوفنى يتسمر مكانه كده زى التمثال..

- يخرّب بيتك يا بت شوفي متتحلك ازاي
- سيبك منه مفضلش غير قعر الحلة ده كمان ابصله استنوا هجنهولك شويه..

وبدلال غمزت له وضحكت فابتسم سمير وأشار بإصبعه لنفسه متسائلاً أنا ؟
ضحكت ورد وأكملت سيرها ..

وقف سمير يتبعها بعينه حتى انتبه ع صوت المعلم سماحة معنفا إياه ..

- انت يلا مش سامع الزباين وهى بتنده على جنابك متسمر

عندك بتعمل ايه؟

- حاضر يا معلم حاضر وهوول الى داخل المحل
سمعت جميلة المعلم سماحة وهو يوبخ ابنها اثناء مرورها
للسوق مع فتحي وبقلب موجوع عليه قررت أن تتحدث مع
سماحة في هذا الأمر فهذه ليست أول مرة تراه يعنف ابنها
أمام الناس وقررت أيضاً أن تتحدث مع أم ورد فرمها استطاعت
أن تقنعها بالموافقه على زواج ورد وسمير ..

-صباح الخير يا معلم

-يا صباح الورد والفل يا أم سمير ايه الخطوة العزيزه دى

-ربنا يخليك يا معلم أجابته باقتضاب

-تشرى ايه يا ست الستات ؟

كات المعلم سماحة يحدثها وعينيه تلتهمان جسدها تنهشان
رقبتها وصدورها اللذان لم تفلح الطرحة السوداء أن تخبئ
جمالهما ذلك الجمال القديم الذى تمناه ولم يناله..

-تسلم يا معلم انا بس كنت عاوزه أوصيك على سمير

-سمير؟ قاطعها سريعاً ماله بقى سمير ؟ ده زى ابنى ولا

تكونيش سمعتينى وانا بزقله هو الأب ميزعقش لابنه ولا إيه

-طبعا طبعا يا معلم انا بس كنت عاوزه اقول

-لا تقولى ولا تعيدى انا اقدر ازعل سمير ولا أم سمير

-أحست جميلة بالحرى من نظراته التي تنهش جسدها الذى

فشلت فى إخفاء مفاته ..

-ربنا يخليك يا معلم ما هو ده العشم وهمت بالانصراف

فمد يده ليصافحها متعمدا الضغط عليها وزفر زفرة ساخنة كالبركان وكأى أنثى فهمت جميلة ما يحاول المعلم سماحة إيصاله لها فجذبت يدها مسرعة ومشت .. لم يتركها المعلم سماحة ترحل في هدوء فظل يتبعها بعينيه يتأمل جسدها الممشوق ومشيتها الهادئة حتى غابت عن نظره ..

- فرسه يا جميلة والله ... خسارة في اللطخ الى اسمه عبده
أما جميلة فظلت تتحسس موضع يده ربما ارتبكت عندما ضغط عليها لكنها لم تنزعج فتصرفاته تشعرها بأنها أنثى جميلة مازالت قادرة على إثارة رجل كسماحة لم تكن تلك المرة الأولى التي تذهب فيها للقهوة بحجة السؤال عن سمير ولكنها تذهب لتستمتع بنظراته لها لتسمع تلك الزفرة كلما صافحها لتنسى أنها أم لثلاث أبناء وزوجة بالإسم فقط تذهب لتتنفس ..

- أمه أمه قاطعها فتحي

- إيه يا فتحي

-أنا تعبت من المشى

-خلاص يا حبيبي مروحين اهو

-مروحين إيه ؟ احنا مش رايعين السوق

-اه اه عاوز تاكل إيه النهاردة ؟

-امممممم بامية بس تكون باللحمة

-حاضر يا سي فتحي بامية باللحمة

استرسلت جميلة بالكلام مع فتحي.. أرادت أن تلهى نفسها
بحوار لا تسمعه حتى تصم أذنيها عن حديث آخر يدور في
داخلها ..
حديث أنثى بحاجة لرجل .

رجعت جميلة للبيت تاركة فتحي يلعب في الشارع مع أصدقائه..
فتحت باب المنزل الخالي إلا من جثة عبده الممدة على الأريكة
كأنها تنتظر أن تقبر .
دخلت في هدوء الى المطبخ وظلت ترمقه في صمت.. رجعت
بذاكرتها بضع سنوات وقت ان كان عبده شابا طويلا ذو ملامح
رجولية خشنة وصوت أجش تذكرت كيف كانا سعداء يقضيان
الليل يتهامسان حتى لا يسمعهم أولادهم ..
لماذا لا تحاول الحديث معه مرة أخرى .. لماذا لا يعودان
كما كانا لماذا لا تشعره أنه حصنها وملاذها ولكن ماذا لو لم
يفهمها ؟ ماذا لو صدها ثانية وسخر منها ..
لا لن يفعل سأحاول ولن أخسر شيئا قالت لنفسها ..
ذهبت وجلست بجواره ع الأريكة ..
- ابو سمير.. عبده .. تمتمت بصوت يخشى المواجهة ..
- ها أجابها وهو يتظاهر بالنوم
النهادة ابنك فتحي حكم عليا اطبخ بامية انا عارفة انك
مبتحبهاش هاعملك جمبها طبق بطاطس ..

لم يرد عليها ولكنها ظلت على إصرارها :

- شفت الراجل الناقص الى اسمه سماحة كان مبهدل ابنك
 قدام الناس انا هشوفله شغلة تانية بدل شغلانة القهوة دى
 -شغل تانى ايه ؟ حد لاقى شغل فى الأيام السوداء دى؟ أجابها
 منفعلا

- سيبه اهو يربيه سى خبيتها ده

-ماتقولش على ابنك كده ده غلبان

-غلبان ولا عدمان أهو القرشين الى بياخذهم نافعا

توترت من ردوده وترددت هل تكمل أم لا لكنها استمرت :

- اسكت مش انا شفت امبارح قميص نوم اسود فى محل أم
 سعاد بس حلو أوى هشتره

- والله براوة يعنى فى فلوس أهو تشتري قميص زفت أومال
 بتدعى الفقر ليه؟

لم تستطع أن تتحملة أكثر من ذلك وانفجر بركانها الخامد منذ
 سنوات :

-أنا زهقت من العيشة دى.. روح اتعالج ولا شوفلك حل فى
 حالتك دى أنا مش قادرة استحمل ..

كانت هذه أول مرة تنفعل فيها بهذا الشكل نظر إليها عبده
 غير مصدق ثورتها وأجابها بعنف.. مش قادرة تتحملى إيه ؟

- عيشتك دى هو احنا إيه رهبان؟

- تصدقى إنك مرة ناقصة دانتى مخلقة شحط لو اتجوز
 يخلف .. ايه مفكرة نفسك نغمة ..

تسمرت جميلة في مكانها للحظات لم تنطق بحرف ماذا تقول وقد تحطم الحصن الذي أرادت الإحتماء به ... شعرت كأنها جندي مهزوم جردوه من جميع أسلحته فهروا لقلعته ليحتمى بها فانهارت أمامه ..

ركضت لغرفتها وارتمت على سريرها وتوقعت فوقه كالجنين كسيرة ضعيفه مهانة ..

استسلمت لأموج من التفكير ماذا تفعل هل تطلب الطلاق ؟ ماذا سيكون مصير أولادها وخصوصا هدى من سيطلبها وأمها مطلقة في هذا السن ؟ هل سيتفهم أبناءها ما حدث ؟ هل تجرؤ على إخبارهم هل تعيش راهبة رغما عنها؟

في وسط كل هذه الأفكار المتدافعه أشفق عقلها عليها وتوقف عن العمل سامحا لها ببضع ساعات تستريح فيهم من معركتها الخاسرة. على الأريكة لا يزال عبده ممددا لاعنا عجزه وظروفه معترفا بينه وبين نفسه ان جميلة ليست ناقصة كما نعتها وانه هو من اجبرها على ان تحيا كراهبة وهى مازالت شابة صغيرة ولكنه لم يستطع فعل أى شى سوى أن يعنفها ويهينها ليحافظ على كرامته ..

قرر عبده الخروج لشراء الحبوب المخدرة ... الشئ الوحيد الذى يساعده على نسيان ضعفه وعجزه لكنه لا يملك النقود ولن يطلب من جميلة وهى فى هذه الحالة بحث فى كل مكان قد تضع جميلة فيه المال ولكنه لم يجد شئى..

هروح أخذ من الواد سمير أومال الواحد بيخلف ولاد الكلب دول عشان إيه ..

ذهب ووقف أمام القهوة وانتظر حتى رأي سمير يضع الطلبات
 امام الزبائن فناده
 -سمير واد يا سمير تعالي عاوزك
 هرول إليه سمير متسائلا :
 -ايه يا آبه في ايه
 -شوفلى معاك كده ١٠٠ جنيه
 -١٠٠ جنيه منين يا آبه ماننا عارف الحالة
 -بقولك لازمى ياد
 -ياآبه بقولك مفيش هو انا هكدب عليك يعني
 تركه عبده ومضى وهو يسب ويلعن الجميع .
 بعد أن مشى أبوه مد سمير يده فى جيبه وأخرج ١٥٠ جنيهه
 متمتماً
 معلش بقى ياآبه الفلوس دى لازمانى ماهو لازم الهيئة دى تتعدل
 شوية.
 منذ ثلاثة أشهر اعتاد سمير أن يقتطع جزءاً من راتبه قبل أن
 يعطيه لأمه كانت تعلم بذلك ولكنها لم تسأله عن السبب ولم
 يخبرها هو
 لم يتوقف عبده لحظة عن سب نفسه وظروفه وفقره وأولاده
 وزوجته حتى وصل أمام المشغل الذى تعمل به هدى لعلمه
 أنها الوحيدده التي لن تكسر خاطره أبداً ..
 سعد الدرج ووقف أمام الباب المفتوح وأشار بيده ليلفت
 انتباهها..
 - مش ده أبوكى يا هدى همست فاطمه إحدى العاملات فى المشغل.

انتفضت هدى من مكانها وهولت اليه :

-ايه يا أبه في إيه؟ أمى ولا اخواتي جرالهم حاجه؟

-يا بت متخافيش مفيش حاجه دانا كنت معدى من جمب المشغل قلت اطمن عليكى بس

- لم يستطع عبده ان يصارحها بحاجته للمال فمئذ بضع ايام فقط اعطته ٣٠ جنيها من نفسها بدون ان يطلب منها لم يستطع تحمل الأدوار المقلوبة في حياته..

- طب انا همشى بقى والتفت بجسده لكنه توقف..

فهمت هدى ما يحتاجه ابوها رأته الحاجة والانكسار في عينيه فأكملت ..

-كويس انك جيت يا أبه مدام فريدة النهاردة عجبها شغلى أوى وادتنى ٥٠ جنيهه مكافئة كنت هديهملك لما ارجع خدهم انت بقى أحسن ما يقعوا منى ..

مدت يدها في حقيبتها الخالية إلا من ال ٥٠ جنيهه .. أعطتها لأبوها الذى لم ينطق بكلمة فقط هز رأسه ومشى ..

وقفت هدى للحظة تفكر كيف ستكمل باقى الشهر متممة

داحنا لسه في يوم ١٨ ثم أكملت مش مهم .. يعنى أنا هعوز

إيه

همت بالرجوع لعملها ولكنها توقفت شمت رائحة تميزها
جيدا رائحة تخبر الجميع أنه قادم مر بجانبها ملقيا التحية :

-ازيك يا هدى؟

لم ترفع عينها عن حقيبتها التي غاصت بداخلها متظاهرة
بالبحث عن شيء ما بداخلها ولكنها أجابته:

-الحمد لله يا مستر شادى

ما أن أدار ظهره حتى تبعته بعينها كيف يمشى كيف يلقى
التحية على العائلات في المشغل ..

-ماما موجودة ..

-ايوه يا مستر شادى اتفضل

-يا لهوى ع القمر تمتمت إحدى العائلات

-صباح الفل يا فريده هانم

-يا فتاح يا عليم طبعا جاى عاوز فلوس؟

-لا والله أنا جاى أصبح على أحلى أم في الدنيا

-تصبح عليا ولا تعاكس في بنات المشغل

-أعاكس مين يا هانم دول هما اللي بيعاكسونى وبعدين بصراحة

مفهمش غير هدى هى بس تشيل الطرحة اللي خانقة نفسها

بيها دى هتبقى مزة مزة يعنى..

-وبعدين يا شادى ده مكان شغل بطل هزار

-ماشى هتدينى كام بقى

-على أساس انك جاى تصبح

-أعمل ايه بس يا ماما كتب جديده هشتريها

بعد ان حصل شادى علي ما أراد قبل يد أمه وأغلق الباب

خلفه بحث عنها بعينه كانت هى أيضاً تراقب الباب فى انتظار خروجه ما ان تلاقى أعينهما حتى أرسل لها قبلة فى الهواء ارتبكت هدى وتظاهرت بالانشغال حتى غادر المشغل ثم تأملته ثانياً ... جسده الطويل وعضلاته المفتولة التي لم تخفيها الملابس ثم تذكرت أحمد بجسده النحيل وعينه المثبته على الأرض دائماً ثم همست لنفسها
لو بس تتنحدر شويه يا أحمد..

حل المساء وأوى كل الى بيته حاملاً همومه وآلامه وآماله وطموحه أغلقت كل أسرة بابها وخلف كل باب قصص وأحاديث..
وقفت أم ورد تعد العشاء والأب أمام التلفاز يتابع الأخبار وورد فى غرفتها تتراقص أمام المرآة وتتمايل مع الموسيقى الصاخبة ثم بدأت تضع مساحيق التجميل على وجهها ككل ليله وكأنها تحاول ان تثبت لنفسها أنها قادرة على خلق الجمال الذى حرمت منه ..

لم تسمع نداءت أبوها لها بخفض صوت الموسيقى حتى دخل عليها غرفتها منزعجا :

-إيه يا بت الدوشه دى وإيه اللي بتعمليه ده

-إيه يا أبه بفك عن نفسى شويه يعنى شوفتنى لبست ونزلت أجابته وهى مازالت تتمايل أمام المرآة
أغلق المسجل بانفعال قائلاً:

-بطلى مياصه يا بت روحى ساعدى أمك فى المطبخ
طيب أجابته بامتعاض:

أغلق الباب بعنف وذهب للمطبخ معنفا زوجته:
شدى ع البت دى شويه يا كريمه
-ليه يا خويا حصل ايه؟

الى بقولهلوك تسمعيه البت كبرت وسرها لازم يكون معاكى
-سر إيه ؟ كل ده عشان البت رقصت ف اوضتها شويه؟

-بقولك ايه يا وليه اسمعى الى بقولهلوك وخلص وانا أول
عريس هيجيلها هوافق عليه ونخلص ونسترها
-الى تشوفه يا خويا اهي بنتك وانت حر

لم يكن حسين مخطئا فى هواجسه فورد لم تكن ملاكا بريئا رغم
صغر سنها فقد قررت أن تتاجر بكل ما تملكه إلا من بعض
قطرات من الدماء خبئتها ليفخر بها أبوها يوم عرسها أصبح
لها عشاقها ومريديها على الهاتف كل ليلة يدفعون الأموال
والهدايا مقابل ضحكات وتأوهات فى مكالمات منتصف الليل..

على الجانب الآخر من الشارع التفت عائلة جميلة حول العشاء طبق من الفول واخر من الطعمية قامت هدى بتقسيمهم على أطباق حتى لا يشعر أحد بقله الطعام انضم لهم عبده كعادته بلا دعوة وانهمك في الأكل محدثا صوتا حتى لا يسمع تذمر فتحي من تكرار نفس الطعام كل يوم .. تركهم سمير ودخل للشرفة أملا أن يرى ورد تنشر الثياب أو تتحدث في الهاتف كعادتها لحقته جميلة متسائلة وهى تربت ع كتفه :

-سرحان في ايه يا سمير؟

-أبدأ يا أمه بشم هوا بس

-وهو الهوا مبيجيش غير من الحتة دي ؟ وأشارت برأسها في اتجاه شرفة ورد :

-قصدك ايه يا أمه؟

-قصدى أنا عارفة إنك عاوز ورد وإنها شاغلة بالك

-ورد؟ ورد مين يا أمه؟ أجابها منزعجا

-قاطعته بحنو يابنى أنا يوم المنى لما اشوفك مبسوط وورد كويسة وأهلها جيرانا من زمن وانا هجس نبضهم

-بجد يامه يعنى ممكن يوافقوا؟

-وميوفقوش ليه يا ابنى ؟ انت بتشتغل وبتكسب وميعيبكش حاجة بس أطرق سمير لحظات بعدما تذكر ما يكفى من أسباب لترفضه

ورد

أحست جميلة بما يدور في رأسه فقاطعته مشفقة :

بقولك ايه يا ابنى سيبيها علي ربنا .. انت بس ناقصك كام
طقم حلو .. بس متنعاش هم أنا هتصرف ..

-لا يا أمه انا معايا فلوس

لم يستطع سمير كتمان سره الصغير عن أمه أكثر من ذلك
فصارحها بالمال الذي يدخره لأربع شهور وطلب منها أن

تسامحه على ذلك

تركته جميلة بعد أن طمأنته أنها لن تهدأ حتى توافق أم ورد

على الزواج ..

ظل سمير واقفا في الشرفة منتظرا خروج ورد كعادتها كل ليلة

وما أن رأته حتى تظاهرت بالسعادة وابتسمت له... رن هاتفها

معلنا وجود زبون جديد متلهفا لكلمات العشق والغرام

فلوحت بيدها لسمير مودعة..

أحس سمير بالسعادة تغمره وشعر أنه قد حان الوقت لكي

يصرح ورد بحبه لها فمن الواضح أنها تبادلته نفس المشاعر

خرج من الشرفة واتجه الى المطبخ ونادى أخته بصوت منخفض:

-هدى

-نعم

-كنت عاوز منك خدمة

-معيش فلوس والله يا سمير آخر ٥٠ جنيه أخدهم ابوك

-لا مش عاوز فلوس عاوزك تيجي معايا اشترى هدوم جديدة

-يابنى انت مبتفهمش هتجيب الفلوس مينين؟

-يا ستي أنا معايا فلوس بس عاوزك تختاريلي على ذوقك

-ماشى عاوز تروح امتى؟

-بكره قبل الشغل

-ماشى

ظل سمير مستيقظا يفكر فى الملابس التي سوف يشتريها والهدية التي سيحضرها لورد وكيف سيصارحها بحبه وأين سيقابلها... ظل يفكر ويفكر حتى غلبه النعاس..

استيقظ مبكرا وأيقظ أخته وذهب سويا ... فى الطريق لمحت أحمد ينتظرها فى الشرفة فأشارت له ألا يلحقها ففهم عندما رأى سمير برفقتها ..

بعد أن اشترى الملابس تركته هدى مسرعة لتلحق بعملها وذهب هو لشراء هدية ورد وحده .

ومع صعودها أول درجات السلم المؤدى للمشغل أحست بوجوده فبدأت تركض مسرعة ثم خافت أن يلاحظ أحد اضطرابها فدخلت المشغل بهدوء ..

-أتاخرتى ليه يا ست هدى؟ سألتها فاطمة

أسرعت هدى بالجلوس على ماكينتها كي لا يلاحظ أحد غيابها وكي تكون فى مواجهه باب غرفه مدام فريدة فتراه عند خروجه -مفيش يا ستى كنت مع أخويا أجابتها هدى متظاهرة

بالإنشغال

-مع أخوكى ولا مع الجو؟ همست إحدى العاملات

-جو إيه؟ أنا معنديش جو ومبحش الكلام ده

-قالتها هدى بحدة ذائدة قالتها لزميلاتها ولنفسها أيضاً ربها

لتتذكر أحمد الذي لا تفكر به إلا عندما تراه كل صباح ليحدثها عن نفس الأمور مرددين نفس العبارات ..
 أما شادى فهو شئ آخر .. دائما في عقلها هو آخر ما تفكر به قبل أن تنام حتى أنه كثيرا ما أتاها في أحلامها مداعبا أنوثتها قالتها وانهمكت في عملها حتى لا تراه وهو يخرج ..
 سمعت هدى صوت الباب وهو يفتح ولكنها لم ترفع رأسها لتأمل ملامحه كعادتها خرج شادى ونظر إليها فوجدها تقلب قطع القماش الموجودة أمامها ولكنه قرر ألا يغادر مهزوما ظل واقفا متظاهرا بمراقبة الفتيات أثناء عملهم ولكنه كان يراقبها هى.. لم تستطع هدى ألا تراه..ألا تتأمل ملامحه المحفورة في عقلها رفعت عينها بهدوء فالتقت بعينه الملونة فاقتحمتها...
 ابتسم لها شادى وهز رأسه ومضى ..

رجع سمير الى القهوة مخفيا أكياس الملابس الجديدة تحت البار تمنى لو يستطيع أخذ إجازة ولو يوما واحدا وارتداءها والذهاب لوردة وإخبارها بحبه ولكن هيهات فالمعلم سماحة متواجد طول اليوم وزميله لن يسدى له هذا المعروف أبداً فاستسلم لقدره وانشغل بطلبات الزبائن وغسل الأكواب ولكنه لم ينسى أن يتفقد الأكياس كلما سنحت له فرصة..

جلس أحمد في كافتيريا كلية الحقوق مع زملائه لمراجعته الملازم
التي يحتاجون لتصويرها ..

-صورلى معاكم ملزمة د. شاکر والمدنى والعقوبات ولو ملزمة
الدولى نزلت صورهاالى..

-حيلك حيلك يا عم ارحم نفسك ..كده كده امتياز زى كل
سنه رد زميله

-احنا هنا طلبة يعنى مهمتنا الدراسة بس يعنى مش الجماعات
والندوات يا عم كريم ولا البنات يا عم أشرف أجابهم أحمد
وهو يقلب الدفاتر أمامه

بمناسبه البنات شوفتوا البت كاميليا إمبارح كانت لابسة حتة
طقم نار

ولا عربيتها الجديدة شفتها يا أحمد؟ سأله أشرف

-لا شفتها ولا عاوز أشوفها أنا ماشى عشان الحق محاضرة الجنائى
وهم بالإنصراف

-ماتقعد يا عم نشوف موضوع الملازم

-ملازم ايه خليكوا فى الأميرة ديانا بتاعتكم وذهب مسرعا
ليلحق المحاضرة .

لم يكن أحمد متيما بكاميليا مثل باقى الطلبة لم يكن يرى فيها
إلا فتاة غنية تافهة لا تفقه شئ فى الحياة غير ماركات العطور
والملابس صوت ضحكاتها العالية مع الطلاب كان يستفزه
بشدة لم يكن يرى فى وجهها أى أثر للجمال الذى يتحدث عنه
أصدقائه ببساطة لم تكن كهده .

- أنا جعت محدش هينزل يجيب فطار ولا ايه؟
- آه أنا كمان جعت حد ينزل يجيبنا سندوتشات ردت هدى
- لا يا حلوة انزلى انتى ولا على رجليكى نقش الحنة
- حاضر سجلت هدى الطلبات في ورقة وجمعت المال من الفتيات
ونزلت
- هدى
- التفتت فوجدته هو نزل من سيارته واقترب منها :
- ازيك يا هدى عامله ايه؟
- الحمد لله يا مستر شادى أجابته وهى تنظر للأرض
- واضح انك مسيطرة علي البنات
- أنا؟ ازاي يعنى
- أصل بقالى أسبوع اقف استنى وقت البريك بتاعكو عشان
اشوفك ألقى واحده تانية من البنات هى اللى نزلت فامشى
- حضرتك كنت عاوزنى ف حاجه
- بصراحة؟
- اه وهزت رأسها بالايجاب
- معجب يا ستى وعاوز نبقى أصحاب
- ارتبكت واحمر وجهها وهمت بالإنصراف
- لحقها شادى وأمسك يدها إيه بس حصل ايه؟
- أصحاب إيه يا مستر شادى انا مش كده
- يا ستى والله ما اقصد حاجة وحشة مش انتى ليكى اصحاب
ف المشغل ؟ خلاص اعتبرينى واحد منهم قالها وهو مازال
ممسكا بيدها

-لا طبعا مينفعش ردت بحدة وهى تسحب يدها
 -ليه؟ عشان انا مبكلمش ولاد
 -يا سلام؟؟؟ عاوزه تفهمينى ان العيون الحلوة دى محدش
 باسهم قبل كده؟
 ركضت من أمامه مسرعة ودخلت الى المشغل وما أن رأتها
 فاطمة حتى بادرتها
 -إيه فين الأكل؟
 -أكل إيه؟ ااااه أصل أصل عاوزه أروح الحمام
 -حمام ربنا يشفى
 اسرعت هدى الى حمام المشغل اغلقت على نفسها الباب
 وبدات فى التقاط انفاسها غير مصدقة لما سمعت
 شادى من تتمناه أجمل الجميلات ينتظرها كل يوم ليراهها
 تعالت ضربات قلبها وهى تتذكر كلماته (العيون الحلوه دى
 محدش باسهم قبل كده)
 تلك هى الكلمات التي تمنى ان تسمعها من أحمد ..أحمد
 الصامت دائما إلا من السؤال عن صحتها وكيفيه قضاء يومها
 -يا ست الحسن هتفطرينا النهاردة ولا الحالة صعبه؟؟ قاطعت
 فاطمه بصوتها المزعج المقارنة المعقودة فى عقل هدى
 -حاضر حاضر رايحه اهو .

ارتدت جميلة ملابسها وقررت الذهاب لأم ورد لتفاتها في أمر
 سمير رأت فتحي يلعب فنادته ليذهب معها
 -هنروح فين؟ لو السوق روحى لوحك
 -لا هنروح نزور أم ورد
 -لا مش عاوز انا هروح العب
 -تعالى وهديك فلوس لما نخلص
 انطلقت جميلة ممسكة فتحي ف يدها مرت في طريقها على
 القهوة وما أن رآها سماحة حتى قام ومشى وراءها مناديا
 -ازيك يا ست جميلة وازى الاسطى عبده؟
 -الحمد لله يا معلم.. سمير عامل ايه ؟
 -يكرم لخاطر عيونك أجابها وعينيه مازالت تتأمل جسدها
 -يلا بقى يا أمه قاطعهما فتحي الذى بدأ يتمل من شدة
 الحرارة
 -اهلا يا فتحي ازيك خد الجنيه ده هاتلك (...)
 التقط فتحي الجنيه من يده قبل أن يكمل جملته وانطلق
 بعيدا ناسيا أمه وأم ورد والعالم أجمع .
 -ليه كده يا معلم؟
 -يا ستى خليه يفرح انتى عامله ايه؟
 -كويسة يا معلم الحمد لله
 -كويسة ازاي بس لهو انا غشيم
 -تقصد ايه يا معلم ؟
 قصى انتى فهما معاشرة واحد عواطلى وشمام بقالك عشر

سين دانتي ليكي الجنة على صبرك ..

طيب يا معلم انا ماشيه عشان مستعجله

قالتها جميلة وهى واقفه مكانها كأنها لا تريد لهذا الحديث

ان ينتهى فهو يعرف جيداً ما يدور فى عقلها ولا تستطيع إخبار

أحد به ربما أيضاً راءها من الداخل مهملة معذبة..

اكتفى سماحة بالتلميح أيضاً هذه المرة ولم يزيد..

مشت وقد زادها حديث المعلم سماحة حماسة اسعدتها

كلماته ونظراته لها سعدت الدرج لشقه أم ورد آملة أن تحصل

منها على كلمه تبشر بها سمير فتحت كريمة الباب مرحبة..

-لا والنبي يا اختى انا مش مصدقة دى ايه الخطوة العزيزة

دى يا ست جميلة كام سنة يا اختى معتبتيش بيتى

-معلش يا كريمة مانتى عارفة العيال ودوشتهم

-آه يا اختى مانا عارفة الله يعينك مانتى أبوهم وأمهم

متأخذنيش يعنى

ابتسمت جميلة برود ولم ترد:

-هقوم أعمل قهوة نشربها

-استنى يا كريمة يمكن يبقى شربات قالتها جميلة وهى تبتسم

محاولة إزالة التوتر الذى سببته كريمة بكلامها :

-شربات خير يا اختى وجلست بفضول

-ورد بنتك

-مالها

-عاوزاها لسمير ابني

تراجعت كريمة للوراء وابتلعت ريقها بصعوبة ولم ترد:

-ايه رأيك يا كريمة سكتي يعنى

-مانتى عارفة يا ختى الراي رأي أبوها هشاوره وابقى رد عليكى

-اه عارفة بس برضو نفسك معانا وسمير انتوا عارفينه يعنى هتسألوا عليه؟

-لا يا اختى نسأل ايه بس أصل البت صغيرة ومعرفش أبوها هيقول ايه..!؟

أحست جميلة بعدم ترحيب من أم ورد فقررت الانصراف

عموما يا كريمة شاوريه وردى عليا

اتجهت جميلة نحو الباب ولكنها توقفت عندما رأت حسيت

أمامها عائدا من عمله ابتسم لها مرحبا

-اهلا ست جميلة ايه الخطوة العريزة ديه؟ ازيك وازى عبده؟

-بخير يا اخويا انشالله تسلم

-طب انتى راحة فين استنى نتغدي

-وأشار لزوجته ان تعد طعام الغدا مصرا أن تجلس جميلة

لبعض الوقت

-قاطعت كريمة الحديث لتشرح لزوجها أسباب قدوم جميلة

إليهم

-أصل يابو ورد أم سمير كانت جاية عاوزه تخ..)

قاطعتها جميلة بسرعة لم ترد أن ترى أو تشعر بالرفض على

ملامح حسين أيضاً ربما أرادت أن تحتفظ ببعض الأمل ربما

ليست ورد هى العروس التي تتمناها لابنها ولكنها تعلم جيدا

مدى حبه لها وتعرف أيضاً مدى سعادته إذا استطاعت تحقيق هذا الأمل له

-بعدين يا أم ورد بعدين ابقى شاوريه وأسرت بالانصراف
أغلق حسين الباب متسائلاً :

-كانت عايضة إيه الست جميلة

-الست جميلة يا سيدى اتجننت وعايضة ورد لسمير ابنها
صمت حسين واتجه نحو باب غرفته لتبديل ملابسه فأسرت
كريمة خلفه فبادرها قائلاً :

-اتجننت ليه بس ؟ سمير ابن حلال و ...

لم تدعه يكمل كلامه وأسرت: بقولك ايه يا سى حسين أنا يا
اخويا عارفة طيبه قلبك بس دى البت الحيلة معدناش غيرها
يا وليه دول جيرانا وعشرة عمر ومشفناش منهم حاجه وحشة
-هما عشان ناس طيبين نرمى بنتنا

-انا هقولهم البت صغيرة ومش هنجوزها دلوقت وهى هتفهم
لم يملك حسين أى ادوات يجادل زوجته بها فإكتفى بالنظر اليها
ولم يعقب :

عادت جميلة الى البيت وارتمت على الفراش بدون أن تبدل
ثيابها حزينة لما شعرت به من رفض كريمة لطلبها ومشغولة
بما دار بينها وبين سماحة لم يعد يكتفى بالتلميح بل كل مرة
يذداد وضوحا واصراراً عن ذى قبل..

هى تعرف تماما ما يريدده ولكننا لا نعرف ما تريدهه هى هل
توافقده أم تصبر هكذا الى الابد ؟ ماذا تفعل ؟ ان لم يكن سماحة

فرېما كان غيره ظلت تفكر الى أن سمعت هدى تطرق ع الباب
لتوقظها
-أمه ايه النوم ده كله قومي عشان ناكل
-معلش يا هدى اتعشى انتى واخواتك انا تعبانه وهنام قالتها
بعده حتى تتجنب اصرار ابنتها
خرجت هدى واغلقت الباب ثم ذهبت لتنادى سمير الذى
كان منهمكا فى تجهيز ثيابه الجديدة واختيار ما سوف يرتديه
غدا عندما يذهب لورد وماذا سيكتب لها على الهديه ؟
فاجاب اخته - أنه لن ياكل وسينام مبكرا
لم تجد هدى غير فتحي القابع امام التلفاز :
-هتاكل ولا شبعان انت كمان؟
-شبعان ايه انا ميت من الجوع
-ابتسمت له طب حط الطبلية يا مفجوع

استيقظ سمير مبكرا جدا ارتدى ملابسه الجديده وأخرج علبه
بها قصاصة صغيرة كتب عليها (بحبك يا ورد)
وقف في انتظارها أمام المدرسة حتى رآها قادمة مع زميلاتها
فأشار لها مناديا

-بيبيبيبي هو انا مش هخلص من الواد ده
بس بصراحة النهاردة الشياكة عالية أوى يا بت يا ورد ردت
فيفى متهكمة

اسبقوا لما اشوف الأهل ده عاوز إيه ومشت في اتجاهه :
-ايه يا سمسم؟ ايه اللي جابك هنا ؟ سألته بدلال
-صمت برهه ثم أجابها كنت معدى جنب المدرسة قلت أسلم
عليكي

-بجد؟ تساءلت بخبث أمال انا ليه حسه انك جاي مخصوص
-ابتسم ثم أجابها ايوه كنت عاوز أشوفك
-ماشي واديك شفتنى سلام بقى وهمت بالانصراف
-أمسك يدها بسرعة قائلا استنى يا ورد أنا جاييلك هدية
-هدية؟ هدية ايه تسألتي بفضول

أخرج سمير العلبه من جيبه فتحها وأخرج منها سلسله
مكتوب عليها ورد

-خطفتها بسرعة من يده و صاحت دى فالصو
-لا والله العظيم دى فضه كان نفسى تبقى ذهب بس
-عارفة عارفة مفيش فلوس قالتها وهى تضع السلسله حول
رقبتها

أغلق سمير العلبة على القصاصة ومدّها إليها
 -مانا خلاص لبستها هعمل ايه بالعلبة ؟
 لمحت ورد البواب وهو يغلق باب المدرسة فركضت مسرعة
 -ورد كنت عاوز اقولك صاح سمير محاولا ايقافها
 -بعدين بعدين يا سمير روح دلوقى
 فتح العلبة مرة أخرى وامسك بقصاصة الورق وتمتم:
 -كنت عاوز اقولك انى بحبك يا ورد

بعينين متسمرتين ع الباب وأنف يعمل بسرعه ١٠٠ شهيق ف
 الدقيقه عليها تشم عطره قبل أن يأتي جلست هدى منتظره
 قدوم شادى تنظر الى المكينة امامها ثم تعاود النظر الى باب
 المشغل وعندما يتست من حضوره قررت النزول لشراء الافطار
 -أنا نازله اجيب فطار اكتبولى الى انتوا عاوزينه ولمو الفلوس
 -مش عاويديك يا ست هدى ايه النشاط ده كله
 -اصلى زهقت من القاعدة هنزل أمشى رجلى شويه
 هبطت هدى الدرج كعجوز فى السبعين من عمرها فقدت
 رغبتها فى الاسراع فى أى شئ أو كشاب يعانى آلام انسحاب المخدر
 أخذت تبحث بعينها عن سيارته وعنه فى وجوه المارة حتى
 ياست ثم فوجئت بمن يطرق كتفها باصابعه
 -كنتى بتدورى عليا صح؟
 نظرت له وعينها مليئة بالارتباك والمفاجأة والفرحة:
 -لا انا كنت بجيب فطار للبنات

-لا لا كنتى بتدورى عليا هو انا اتكسفت اقولك المرة اللى فاتت انى بستناكى كل يوم؟ مكسوفة ليه بقى؟
لم تستطع هدى ان تخفى فرحتها وارتابها فأثرت الهروب حتى لا ينكشف أمرها ..
-انا همشى بقى أصل اتاخرت

نظر لها نظرة معاتبه وأجابها طيب يا هدى براحتك
مشت بعدها بضع خطوات وهى تتساءل ألن ينادينى ؟ ألن يأتى خلفى؟ ربما غضب منى ولن يحدثنى مرة أخرى ..
توقفت ثم نظرت للوراء فوجدته يمشى فى الاتجاه المعاكس
مشى وتركها تشعر بالندم وتعنف نفسها
-بيبيى أنا عملت ايه ؟ اكيد طبعا زعل منى مستحيل يكلمنى
تانى طبعا مش كفاية إن واحد زيه حب واحد زى؟ ايه اللى
يهحصل يعنى لو كنت ووقفت معاه ؟ الدنيا هتخرب؟
-ايه مش تفتحى ؟ انتى عاميه؟

انتبهت هدى على صوت أحد المارة وهو يعنفها لأنها صدمته
بدون أن تشعر

-معلش يا عمى مخدتش بالى
نظرت للوراء مرة أخرى حتى تأكدت أنه غادر فمشت
منكسرة لمحل الطعام

جلست ورد مع صديقاتها في فناء المدرسة تلتهم الطعام بيد
وبالأخرى تمسك تليفونها الجديد الذي حصلت عليه من أحد
عشاقها

-الله ده تليفون جديد؟ وريني كده وخطفته فيفى من يدها
مين ادهولك يا بنت المحظوظه؟

-الواد محسن أجابتها ورد وهى تعلق علكتها كفتاة ليل
محترفة

-والله الرجاله دول عبط تليفون بكام ضحكة وكام مكاملة
-لا يابت مانا برضو آخر مرة ذودتها معاه شوية كام بوسة
على كام حزن وطلعنا بالتليفون

-انت مش هتجيبها لبر يا ورد ردت آمال بامتعاض
-بس يا هبله مش المهم ان الطبق مينكسرش الطبق سليم
وزى الفل ردت ورد وهى تضحك

وايه السلسله دى كمان يا قرده؟ دى من المعدول سمير فالصو
زى وشه بالظبط

حرام عليكى يا ورد ده بيحبك بجد مش زى اللى بيتسلوا معاكى
وانا مبطقش أمه بس أهو اللى يجى منه أحسن منه
دق الجرس معلنا انتهاء وقت الراحة مللمت الفتيات بقايا
الطعام وانطلقن نحو فصولهن لتلقى درس عن الاخلاق
الحميدة ..

أنهك التعب فتحي بعد أن ظل يلعب الكرة في الشارع لثلاث ساعات فعاد الى البيت دق الباب فلم تسمعه جميلة النائمة في فراشها قفز من الشباك وذهب ليرقى في حضنها فشعرت به ايه يا فتحي العرق ده كله هتعيأ كده يا بنى

-بس ايه هريناهم اجوان

-هما مين دول؟ سألته مبتسمه

- الواد حماده شلبى والشله بتاعته

- يا سلام يعنى مجاش فيكم ولا جون؟ سألته بحنو وهى تمسح العرق عن جبينه

- لا طبعا رد فتحي مفتخرا بنفسه فقد كان حارس مرمى اليوم

- احطلك تاكل؟

- لا انا عاوز انا

وفعلا ما ان صمتت لبرهه حتى غط في نوم عميق اخذته جميلة في حضنها واكملت نومها

غفلت للحظات ثم استيقظت على صوت طرقات على الباب قامت مترنحه لتفتح طانه أنه سمير أو هدى فتحت الباب فوجدته أمامها ما أن رأته حتى ركضت لغرفتها مرة أخرى لتضع عباءتها وتغطي شعرها

-خير يا معلم؟ تساءلت بفضول

- إيه يا ستى انتى بخيله ولا ايه؟ مفيش اتفضل يا معلم

- انا لوحدى يا معلم مفيش حد فى البيت

-طب مانا عارف ان مفيش حد وعشان كده جيت

- يعنى ايه يا معلم؟ قالتها وقد بدأ صبرها ينفذ

-يعنى ادخل ونكمل كلامنا

لم يكن المعلم سماحة ليتصرف هكذا بهذه الجرأة من تلقاء نفسه
 كان يعلم ما تشعر به جميلة تماما ولكنه أراد أن يخطو هو
 الخطوة الأولى لتخطو هي بعدها خطوات
 لم ينسى يوما رفضها له منذ ٢٠ عام وتفضيلها عبده عليه ربما حان
 الوقت ليعوض ما فاتته منها ويثبت لها سوء اختيارها أو ربما حان
 الوقت لينتقم منها لا أحد يعلم
 مفيش كلام بينا يا معلم وأشارت له بالانصراف
 أمسك بيدها وهمس:

-بصى يا ست الستات انا عاوزك وعارف انك عاوزانى وأكثر منى
 كمان وانا مبطلبش الحاجة مرتين فكرى وانا مستينيكى
 أغلقت جميلة الباب وجلست تفكر فيما قاله سماحة صارحت
 نفسها بالضعف الذى اعترأها عندما أمسك يدها جلست تفكر
 وتفكر ثم أخذت قرارها لن تكون عشيقة احدهم فتاة ليل
 وزوجة فى آن واحد ستحاول مرة أخرى مع زوجها وسوف تنجح
 كانت الساعة تقترب من السادسة مساء نهضت جميلة وارتدت
 ملابسها الثقطة قلم وورقه صغيرة كتبت عليها الحبة الزرقاء ثم
 ايقظت فتحي :

-فتحي فتحي قوم يا حبيبي

-يوووو سيبينى انام

-انا عيانه يا فتحي روح الصيدلية هاتلى الدوا ده

-عيانه ايه مانتى كويسة اهو رد عليها وهو نصف مستيقظ

-لو رحت هخلى اخوك ياخذك يفسحك انت واختك

-بجد؟؟

-اه بس متجيش من الاجزخانه اللى ف الشارع روح اللى عند

الموقف

-ليه بقى دى بعينه اوى

-معلش يا حبيبي مانا روحتها وملقتش الدواء ده فيها

-ماشى وقام من الفراش متناقلا

اغلقت جميلة الباب ع نفسها وبدأت تجهز نفسها للقاء طال انتظاره
انتظرت حتى عاد فتحي بالدواء دسته فى حقيبتها وانطلقت معه
للمقهى اشارت لسمير واخبرته ان هناك زبونه وابنتها سوف يأتيان
الى البيت للاتفاق على ملابس للعرس وسوف يشعرون بالخجل اذا
كان هو موجود لأنهم ليسوا من أهل الحارة وهى تريداهم ان
يشعروا بالارتياح حتى يجلبوا لها زبائن اخرين

-خلاص يا امه اقل انا النهاردة وارجع متأخر عشان ياخدوا راحتهم

-لا يا حبيبي انا عاوزاك تاخذ اخواتك وتروحووا تشموا هوا شويه

-بس انا ممعيش فلوس يا مه ولا هاخداهم امشيهم بس

-لا يا حبيبي خد ١٠٠ جنيه اهم بس عاوزاكم ترجعوا مبسوطين

-طب وزباينك دول هيمشوا امتى؟

-معرفش يا سمير هو انا هقولهم انتوا هتمشوا امتى انا هروح

اشترى شويه حاجات لزوم الشغل وانتوا عدوا على اختكوا وخدوها

معكم

هز سمير رأسه بالموافقه ولم يعقب :

مشت جميلة وهى تخطط ماذا ستشترى وماذا ستتردى وماذا

سيأكلان رجعت للبيت بعد ان اشترت ذلك القميص الأسود الذى

طالما تمنى ارتدائه ووضعت البيرة داخل الثلاجة خلعت ملابسها

وتحتمت سريعا وتحولت من الزوجه والأم الى امرأة ..امرأة تنهيه

لزوجها محاولا استعاده ذكرى ايام مضت

رتبت غرفه النوم، ارتدت قميصها، ووضعت زجاجات البيرة والأكواب على الطاولة وجلست في الانتظار
مر الوقت ثقيلًا عليها وهي تتخيل ما سيحدث إلى أن سمعت باب الشقه يفتح وصوت عبده وهو يشدو اغنيته المفضلة وهو تحت تأثير المخدر...

يامه القمر ع الباب ااه نور اناذيله ااه
قامت مسرعة وفتحت باب الغرفة بدلال واستقبلته بابتسامتها كانت جميلة مستعدة لفعل أى شئ لتستعيد حياتها أى شى حتى لو ضحت ببعض كرامتها من اجل ذلك
نظر اليها وهي تستند على باب الغرفة فسألها وهو يترنح
-انتي واقفه كده ليه؟

-مستنياك وامسكته من كتفه كى لا يقع

-فين العيال؟

-خليتهم يروحا يتفسحوا عشان نقعد مع بعض

-ااه فهمت ومشى مترنحا باتجاه الفراش مناديا إياها تعالى
-اشعلت الكاسيت ع صوت أم كلثوم وهي تغنى ألف ليلة وليلة
صبت البيرة في الأكواب ووضعت له الحبوب في كاسه وناولته إياه
وبدأت تتمايل مع الموسيقى
-خمره؟ هتشرى خمره يا وليه

وضعت جميلة يدها ع فمه حتى لا يفسد ما تحاول صنعه ثم ربطت ايشارب حول خصرها وبدأت في الرقص أمامه وكلما فرغ كاسه صبت له الآخر ..

اقتربت منه وبدأت في خلع ملابسه ثم همست في أذنه وهي تقبله أن يساعدها في خلع ملابسها ثم ارتمت على الفراش في

انتظاره مغمضه العينين ..

شعر عبده ولأول مرة منذ سنوات طويلة بقوة تسرى في جسده
وبرغبة تشتعل في جسده فمد يده ليجذبها إليه ولكنه شعر بألم
في صدره يعتصر قلبه ..

صرخ متألماً آآآه ثم سقط ع الفراش بلا حراك في لحظة لم يستغرق
الأمر كله أكثر من لحظة.

نظرت جميلة لزوجها الممدد على الفراش بجانبها لم تحاول أن
تحدثه أو تحركه عله يفيق مر الوقت وهي جالسة بجواره لم
تحاول حتى أن تغطى جسدها أو جسدها زوجها ..

ظلت تنظر إليه وتعلو وجهها ابتسامه كتلك التي تعلو وجوه
بعض الموتي ولا أحد يدري أهى ابتسامه البشرى بما رآه ينتظره
ف الحياة الأخرى أم هى ابتسامه من لا يخشى فقدان شيئاً لأنه
بالفعل قد خسر كل شئ ولن يزيد الموت من خسارته شيئاً .

-شفتوا الرجل الطويل الى كان قاعد قدامى يخرب بيته نص
الفيلم ضاع منى بسببه ...

ضحكت هدى بصوت عالى : ولا شخير سى فتحي الى فرج
علينا الناس

-أجابها سمير وهو يدخل الحمام ...

وضعت هدى فتحي ف الفراش ثم نادى على أمها من أمام
غرفتها ثم بدأت فى طرق الباب بعنف عندما لم تحظى برد
منها ..

فتحت هدى الباب وبدأت بالصراخ أتى سمير مسرعا وقعت
عينه على أمه وهى شبه عارية قام بوضع عبائها عليها
وأخرجها هى وهدى من الغرفة ثم وضع غطاء على وجه
أبيه وأغلق الباب

بعد الانتهاء من مراسم الغسل والدفن جلس سمير أمام البيت
يتلقى العزاء فى والده لم يحضر الكثيرون للعزاء فعشر سنين
من الإدمان والعزلة أفقدت عبده الكثير من الأصدقاء فقط أتى
بعض رجال الحارة على استحياء وبالطبع هو أيضاً

-السلام عيكم يا رجاله البقية فى حياتك يا سمير يابنى

-حياتك الباقيه يا معلم

-وضع المعلم سماحة يده على كتف سمير وربت عليه بحنو
وهمس فى اذنه:

-كنت عاوز ادخل واعزى الست والدتك واختك هدى طبعا

-اه طبعا يا معلم اتفضل وهم سمير بإدخاله للبيت

-يا ابنى هو انا غريب خليك انت مع الناس وانا كلمتين
وخارج

دخل سماحة الشقه فلمحها جالسة بين النساء صامته منكسة
الرأس كعادتها وهدى بجانبها تبكى أباهها بصمت
سعل بقوة ليسمعها لكنها لم تنتبه:

-أهلا يا معلم اتفضل يا اخويا لهو انت غريب قالت احدى النساء
-لا دانا كنت عاوز الست أم سمير فى كلمتين وادخل يده فى
جيبه متظاهرا بإخراج شيء ما..
لم ترفع جميلة رأسها وتظاهرت بعدم السمع حتى نغزتها إحدى
النساء

-قومى يا اختى شوفى المعلم عاوزك فى إيه ..
رمقته من بعيد استجمعت قواها ومشت اليه:
-أنا جاى أعزى واعمل الواجب
لم ترد جميلة وتابعت النظر اليه بانكسار:
طب بزمتك مش كده أحسن أهو انتى بقيتى أرملة وانا
مطلق ليا زمن إيه يمنع بقى ..
تابعت جميلة النظر اليه فى انكسار:
لاحظ سماحة أن النساء بدأو فى التهامس متعجبين من إطالته
الوقوف معها فهمس لها

-انا عارف ان الظرف مش مناسب نكمل كلامنا بعدين خدى
دول عشان المصاريف سحب يدها ووضع فيها المال ومضى
رجعت جميلة لمكانها وسط النساء ملحت إحداهن المال فى
يدها فهمست

-والله فيه الخير اهم يساعدوا برضو ..

مرت أيام العزاء لم يشعر أحد بفقدان من رحل ولكنهم تظاهروا بذلك نعم فمن حق الميت على الأحياء أن يحزنوا عليه..
استيقظت هدى وارتدت ملابسها لتعود لعملها بعد غياب ثلاث أيام العزاء وأثناء سيرها سمعته ينادى عليها استوقفها أحمد ليعزيها معذرا عن عدم ذهابه للبيت ليعزيها بنفسه خوفا من همسات الجيران مكتفيا بتقديم واجب العزاء لسمير مع باقى رجال الحارة..

ظل أحمد يحدثها ويطمئن منها عن حال أمها واخواتها وهى ترد عليه باقتضاب أو تكتفى بهز رأسها بالايجاب أو النفى كان يحاول خلق أحاديث معها ليخرجها من صمتها وحزنها لكنه للأسف لم يكن موهوبا فى ذلك ..

-هو انتوا الهدوم اللى بتفصلوها بتعملو فيها إيه يا هدى
نظرت له طويلا قبل أن تجيبه
-هدوم ايه؟

-اللى بتفصلوها قصدى بتودوها فى
توقفت هدى عن السير ونظرت اليه بحنق:

-انت مستينى عشان تسألنى عن الهدوم اللى بنفصلها بنوديا فى؟
-مالك يا هدى بتكلمينى كده ليه ؟

صمتت للحظة محاولة ابتلاع غضبها سكنت لتتجنب مواجهة قد تكون النهاية ولكنها لم تستطع أو ربما أرادت هذه المواجهة فلتحدث الآن ان كان لابد أن تحدث ..

-مليش يا أحمد أنا بس أبويا مات من ٣ ايام وكان نفسى لما أشوفك اسمع منك كلمه تهون عليا شغل ايه اللى بتسألنى عنه

كل مرة تشوفنى فيها أنا حسه انى ست عجوزة حسه ان عندى
٧٠ سنة ..

نظر اليها أحمد متعجبا من انفعالها الغير مبرر:

-طب يا هدى قوللى عاوزانى اقولك ايه وانا أقولهلوك

-أقولك عاوزه ايه؟ حاضر يا أحمد هقولك

نفسى تكلمنى ف التليفون بالساعات زى بقية البنات نفسى
تمسك ايدى وتقولى عنيكى حلوة نفسى وانهمرت فى البكاء
-إيه كمان يا هدى نفسك فى إيه تانى؟ عاوزة تبقى زى البنات
الى مش متربية؟! عاوزانى اقعد أحب فيكى فى التليفون واتغزل
فى عنيكى وشفافيك؟!!

لم يعطها أحمد فرصة للرد أخذ يتحدث ويتحدث غير عابئ
بالدموع المنهمرة من عينها لم يرد أن يسمع منها كلمة أخرى
تتلاشى معها أيقونة القديسة للتحويل لفتاة عادية تشتتهى من
يتغزل فى مفاتها

مسحت هدى دموعها التي لم تجدى نفعا معه وقررت أن تذهب

-انا اتاخرت ولازم أمشى

قالتها واستدارت لتغادر أملا أن يمسك يدها ويطلب منها أن
تبقى وتغفر له بروده معها ولكنه اكتفى بكلمات جوفاء ككل
مرة

-انتى اعصابك تعبانة يا هدى روحى الشغل وبعدين نتكلم

مضت هدى فى طريقها ولم ترد مملوءة بالغضب والحسرة حقيقى
أنها تشعر بميل شديد تجاه شادى الذي فجر داخلها براكين
من المشاعر التي لم تعرفها من قبل ولكنها أيضاً ليست ساذجة

لتصدق أن القوانين الكونية سوف تتعدل ليتزوج الأمير من الفتاة الفقيرة ولكن أحمد هو من يناسبها فلن يعايرها يوما ما بأصلها المتواضع فكلاهما في الفقر سواء ولكنه للأسف فقير حتى في مشاعره وحبه لها ..

وصلت للمشغل فوجدته أمامها وسيم كعادته أنيقا في كل شئ حتى في نظرة القلق في عينيه..

استوقفها فلم تعترض فقد تمت أن تراه بعد معركتها مع أحمد

-البقية في حياتك يا هدى قالها وهو يحتضنها بعينيه

-حياتك الباقية يا مستر شادي

-مع اني زعلان منك بس لما سمعت بموت باباكي كنت هاجي

أعزيكي بس خفت أعملك مشكلة كبيرة في البيت

-ليه حضرتك زعلان مني؟

-حضرتك؟؟ ماشي حضرتي زعلان عشان حضرتك مش حاسه بيه

خالص مع إنك عارفة ومتأكدة اني بحبك وإن عنيكي الحلوة دي

آخر حاجه بفكر فيها قبل ما أنام وأول حاجه بصحى عليها

الصبح

-أنا ؟ بجد ؟ أجابته بصوت لا يسمعه إلا هي

أمسك بيدها ووضع فيها ورقة بها رقم تليفونه:

-خدي يا هدى ده رقمي كلميني لما تروحي ع الواتس

-واتس؟

-ايوه انتي مش تليفونك فيه نت؟

- لا

-اممم طيب مش مشكله أنا هتصرف

هزت رأسها بالموافقة

-معلش يا هدى أنا لازم أمشى شريف الزفت ده عمال يزمرلى
عشان عندنا محاضرة مهمة وأشار لسيارة منتظره فى الجانب
المقابل

-ماشى ردت بخجل

-هشوفك بكره فى نفس الميعاد

-حاضر

-عبر شادى الشارع وركب السيارة وأومئ لزميله بالانصراف

-ايه بقى يا زميلى؟ ايه زنبى انا فى اللطعة دى؟ قالها شريف
بتتافف

-بس ايه رايبك فى الفرصة تستاهل صح؟ فرسه ايه يا بنى دى
شبه شحاتين السيدة

-طول عمر ذوقك لوكل الصراحة

-بس لما بيجوا بيخدموا صح ولا لا؟ سأله شادى

-بصراحة اه ودى هتخدم امتى يا صاحبى؟

-اصبر بس احسن دى عايشه دور الحب والغرام

-ماشى يا صاحبى بس متنسنيش

-عيب عليك دى الدعوه هتبقى عامه..

ممددا على الفراش مديرا ظهره للمكان وللحياة محاولا لا
إراديا اخذ مكان أبيه الراحل..

اقترب منه فتحي محاولا إيقاظه فلم يستجب فصفعه على
وجهه ليوقظه فابتلت يده..!

-انت بتعيط يا سمير؟ سأله براءة غير معتادة منه

-امشى ياد غور من هنا ودفعه بقوة فسقط على الأرض فبدأ
بالصراخ واتجه الى غرفة أمه يشتكى لها

-ضربك ليه ما انت اكيد ضايقته

-لا معملتلوش حاجه أنا بسأله بتعيط ليه ضربنى

انتفضت جميلة من فراشها وذهبت له :

-بتعيط ليه يا سمير؟ سألته بحزم

- مفيش يامه

-هزته بعنف ربما لأول مرة قوم كده كلمنى زى الرجالة

فهى إن كان سمير هو ابنها المفضل إلا أنها تحتاجه بجانبها
لا تريد ابنا ضعيفا يبكى كالنساء بل رجلا قويا وظهرها تستند
إليه..

جذبتة من ثيابه لتفيقه مما هو فيه إلا أنها ما أن لمحت
الدموع فى عينيه الحمراويين حتى عادت لضعفها وحنانها

-ليه يا بنى البكى ده كله ؟

سكت سمير لبرهه وهو ينظر لأمه مستنكرا سؤالها أطال
صمته محاولا كبح ذلك البركان المتقد بداخله ولكنه لم يستطع

فانفجر فى وجهها

-يا أمه انتى مش شايفه حالتى؟ مش شايفى شكلى؟ مفيش

واحدة هترضى تتجوزنى لا اللى بحبها ولا غيرها وابويا اللى مات
وسبنا والمفروض إن أشيل مسؤليتكم وانا مش عارف أشيل
مسؤولية نفسى والمعلم سماحة اللى مبيتكيفش إلا لما يهزقنى
قدام الناس أعمل إيه يامه أموت وارتاح ووضع وجهه بين
يديه ليخفيه عنها واستمر ف البكاء.

أيقنت جميلة بفطرتها أن المشكلة فى ورد ليس فى أى شئ آخر
حاولت أن تخفف عنه قليلا فأخبرته أنها ذهبت وتحدثت مع
أمها

رفع سمير وجهه غير مصدق:

-بجد يامه؟ طب ليه مقولتليش

-ماهى يابنى مردوش عليا لسه

-طب تفتكرى هيوافقوا؟

نظرت جميلة لابنها المتلهف لإجابتها رتبت ع كتفه وأخبرته
ان هذه الأمور نصيب وحاولت اقناعه أنه ان لم تكن ورد فرما
غيرها

لم يدعها سمير تكمل وقاطعها :

-بس انا بحب ورد من زمان يا مه ومش عاوز غيرها

-عارفة يا ابنى قوم انت روح شغلك وسيب ربنا يدبرها

حاضر وذهب ليرتدى ملابسه وانصرف وهو فى طريقه قرر ان
يذهب لورد ليعرف رأيها بنفسه انتظر حتي رآها وفاتحها فى
الأمر

ورد أنا أمى قالتلى انها راحتلكوا البيت وطلبتك من أهلك
وكنت -عاوز أعرف رأيك ايه

- طلبتني محدش قالى يعنى

- طب انتى رأيك إيه ؟

أنا وتظاهرت بالارتباك مش عارفة يا سمير سبنى أفكر ولا

مش من حقى أفكر ؟ أجابته بدلال

-ورد أنا عارف انى فى عيوب كتير بس انتى لو وافقتى هعمل

أى حاجه انتى عاوزاها هشتغل ليل ونهار عشان أجيبك اللى

نفسك فيه

-بجد يا سمير؟ بتحبنى اوى كده ؟

-اه والله يا ورد عمرى ما حبيت حد غيرك

-ماشى يا سمسم هفكر وارد عليك تركته ومضت ناحيه زميلاتها

وظل هو يتبعها بعينيه وقلبه حتى اختفت

- ايه كان عاوز ايه سى روميو؟ سألتها فيفى

-قال ايه بعث أمه تخطبنى وجاى يسألنى عن رأيي

ده واخذ الموضوع جد بقى

-تخيلوا اصوم وافطر على سمير

-طب ليه لا يا ورد فى واحده تلاقى حد يحبها كده وتبتطر

عليه عقببت امال التى شعرت بالضيق من تصرفات ورد

لشعورها بصدق سمير ولأنها فتاة رومانسية تعلم تماما ان

مثل هذه المشاعر لا ينبغى لها إلا أن تقابل بمثلها

-الله يخليكى يا ست أمال خليكى فى قصصك ورواياتك ولا

روحى حبيه انتى ردت ورد بعصبية..

-بس هو بيحبك انتى

- يبقى خلاص بقى ده موضوعى وانا حرة فيه

-طيب أنا ماشية وانصرفت آمال
 -ظلت ورد وفيفى يتغامزان على آمال روحى بكره تتجوز
 واحد -يأكلها حب و عواطف
 سعدت ورد سلام البيت ودقت الجرس فتحت لها أمها القت
 حقيبتها على الأرض كعادتها وجلست بجانب أبيها على الطبلية
 وأخبرتهم بما قاله سمير..
 -إلا صحيح يامه سمير بعت أمه تخطبنى
 انفعلت أمها ووجدتها فرصة لتنتهى هذا الموضوع
 -شفت يا بو ورد أنا قتلتك تقطعها مع جميلة أهو الواد
 يشاغل البت اهو وبيروحها المدرسة
 -هو بيكلمك ليه يا بت ؟ هو فى بينكم حاجه؟
 - لا والله يا أبه هو اللى مديقنى فى الراحة والجاية
 لم يجد حسين أى مبرر للدفاع عن سمير فأخبر زوجته أن تنتهى
 هذا الموضوع مع جميلة ..

مرت أيام والكل في حالة من الانتظار سمير منتظر الرد من ورد
وهدى كل يوم تنتظر شادى أمام المشغل بلا جدوى وجميله
أيضاً في انتظار شئ ما يجعلها سعيدة..

استيقظ أحمد على على صوت أمه وهى عائدة من الخارج
حاملة في يدها أكياس كثيرة من السوق نهض مسرعا ليعاونها
-ليه مصحتنيش أروح معاكى يا أمى

-شفتك بتحلّم ومبسوط قلت اسيبك

-سكت أحمد خجلا ولم يعقب

-طبعا هدى مش كده؟ ربنا يا ابني يجعلها من نصيبك

فرح أحمد كثيرا ان أمه فتحت معه ها الموضوع فاراد ان
يستغل الفرصه ليخبرها برغبته في الارتباط بهدى وطلب منها
ان تتحدث مع أمها بهذا الشان ولكنها رفضت لان الوقت غير
ملائم لمفاتحتها في هذا الأمر

-يا أمى احنا جيران واهل وانا قاصد دلوقتى عشان اكون
جمبهم لو احتاجوا حاجة

-برضو يابنى معلش نستنى شوية الأصول كده

-حاضر ياامى اللى تشوفيه

ارتدى أحمد ملابسه وانطلق الى الكلية ذهب الى الكافتريا ليبحث
عن صديقه أشرف حتى وجده واخبره برغبته في العمل معه في
المطعم الذى يعمل به فوعده اشرف ان يكلم المدير بخصوصه

جلست هدى أمام ماكينتها تراقب الباب كعادتها كل يوم فقد مر بضع أيام لم تراه ولم تستطع أن تتصل عليه رغم أنه أعطاها رقمه

مرت ساعات وهى عيناها مثبتة علي الباب حتى رآته يدخل لم تستطع أن تتظاهر بالانشغال هذه المرة كما اعتادت ..

في حد مع مدام فريدة ؟ سأل شادى السكرتيرة

-ايوه يا مستر معاها عميل اتفضل حضرتك استريح لحد ما يخرج

جلس مقابلا لهدى وابتسم لها فردت بخجل شاكره حظها الذى منحها هذه الدقائق لتراه فيها..

خرج الرجل بعد دقائق جلس شادى بعض الوقت مع أمه ثم خرج مشيرا لهدى ان تتبعه لاسفل فهمت اشارته ونزلت وراءه بعد ان تحججت بالذهاب الى الصيدلية المجاورة نزلت الدرج مسرعه لم تستطع ان تخفى مشاعرها فسألته معاتبه..

-كنت فين؟

-وحشتك؟ سألها مبتسما

-لم ترد واكتسى وجهها بالحمرة

- شكلى وحشتك اعترفى

-مخبى إيه ورا ظهرك؟ سألته وهى تحاول رؤيه ما يخفيه

-مش هقولك إلا لما تقوليلى

-اقولك ايه بس؟

-تقولى وحشتنى

-لا موحشتنيش

-كدابة أومال زعلتى ليه لما غبت اليومين اللى فاتوا

سألها وهو يرفع وجهها لأعلى باصبغه

٥- أيام مش يومين

-ياه دانا وحشتك أوى دانتى بتعدى الأيام

-مخبي ايه بقى؟

-ماشى يا ستى هقولك ده التليفون اللى وعدتك بيه اتفضلى

يا ستى وده الخط عليه باقه نت انا بعد اذنك طبعا سجلت

نفسى ب حبيبي ده لو معنديكيش مانع يعنى

-خطفت الهديه من يده واسرعت الى المشغل

كان شادى يعلم جيدا ما يفعله هو لم يتركها تحبه لم يعطها

الاختيار بل قرر لها أن تحبه ..

لم يستطع سمير الانتظار اكثر من ذلك فقرر الذهاب لورد لمعرفه رأيتها استغل قلبه عدد الزبائن في القهوة بسبب حرارة الجو في هذا الوقت واستأذن زميله أن يتغيب ساعة واحده موكدا له أنه سيرجع قبل وصول المعلم سماحة

ركض الى البيت مسرعا ابدل ثيابه وذهب ليلحقها عند خروجها من المدرسة

لمحته آمال من بعيد فذهبت اليه وقررت إخباره بالحقيقة

-ازيك يا سمير؟

نظر اليها متعجبا من معرفتها له:

-انت متعرفنيش أنا آمال صاحبة ورد

فرح سمير جدا معتقدا أن ورد هي من أرسلتها :

-بجد؟ هي اللي بعنتك صح؟

-لا انا بس كنت عاوزه أقولك على حاجة

صمتت لبرهة ولم تستطع إكمال الحديث

-ورد جralها حاجه ؟ سألتها بقلق وبدأت قطرات العرق تتصبب من وجهه

نظرت إليه آمال متعجبة من شدة حبه لها وقلقه عليها فقررت إكمال حديثها..

-سمير أنا عارفة انت بتحب ورد قد ايه بس للاسف هي

متستهلش حبك ده دى بس بتتسلى بيك قدام البنات..

-كدابة انتى اكيد كدابه صرخ في وجهها وقد بدا يتلعثم في الكلام

-انتى أكيد بتغيرى منها ورد بتحبنى من واحنا عيال صغيرين

وبعدين أنا ..

لم تمهله آمال أن يكمل حديثه امسكت بيده ووضعت فيها ورقه صغيرة

-ده رقم تليفونها غير صوتك وكلمها وشوف بنفسك..
تركته امال ومشت ظل سмир واقفا لبعض الوقت محاولا
استيعاب ما حدث أطبق على الورقة بقوة والقاهاع الأرض
مشى خطوات ثم التفت ثانية والتقطها دسها في جيبه ومضى
عاد الى القهوة وانهمك في تلبية طلبات الزبائن وجمع الحساب
منهم ولكنه لم ينسى للحظة الورقة المدسوسة في جيبه ظل
يتحسسها كل دقيقة ليتأكد أنها موجودة ..

جلس أحمد في مدرج كلية الحقوق مدرج ضخم يضم آلاف من الطلبة والأحلام والأمنيات أيضاً تسمرت عينه على الدكتور المحاضر يتابع كل كلمة يقولها ويدونها حتى لا يرهق أمه بشراء جميع الكتب المقرر وبينما هو كذلك كانت هناك عينان تتابعه هو ليس اليوم فقط بل كل يوم ليست هي الطالبة المجتهدة الحريصة على حضور جميع المحاضرات ولكنها تفعل ذلك يوميا لتكون قريبة منه إنها كامليا أو الأميرة ديانا كما يحب الطلاب ان ينادوها شقراء طويلة ذات عيون لوزيه خضراء تحتاج فقط من دقيقة لدقيقتين لتأسر قلب أى شخص يراها ..

هي نفسها لا تعرف لماذا تفعل ذلك لماذا أحمد تحديدا وكل الشباب يتهافتون عليها

نظرت اليه مبتسمة وتذكرت الموقف الوحيد الذى جمعها به كانت تقود سيارتها أمام الجامعه وكادت أن تصدمه فوقع على الأرض نزلت بسرعة من السيارة لتطمئن عليه ولكنه لم يعرها أى انتباه فقط أبعد يدها عنه مكتفيا بعبارة واحدة ..

-حصل خير يا آنسه

لماذا نحن هكذا ؟ لماذا نلهث وراء من لا يرانا ونترك خلفنا من يتنفسنا ؟ لماذا نقضى الليل نفكر فى النائمين وننسى من يسهر من اجلنا؟

ربما لو أبدى أحمد إعجابه بشعرها الذهبى أو عطرها المثير لما تذكرته فى اليوم التالى كثيرا ما قررت أن تخلق معه أى حديث لثير انتباهه ولكنها تراجعته كل مرة ولكن لا مفر لابد له أن يأتى كما أتى الآخرين ...

انتظرت حتى انتهت المحاضرة وبقي هو لحظات يرتب أوراقه
ويضع خطوطا تحت النقاط المهمة لمراجعتها اقتربت ووقفت

بجانبه

- أحمد

رفع عينه فرآها بجانبه :

- نعم

- أنا كامليا زميلتك في الدفعة

- عارف حضرتك .. اتفضلى أجاها وهو مازال يعبث بالأوراق

أمامه

- غريبة؟ ونظرت له بتعجب

- هو ايه اللى غريب؟ لا بس فكرتك مش عارفنى ردت بسرور

- رفع أحمد عينيه بتثاقل

- ازاي ؟ هو في حد في الكلية ميعرفكيش

- قالها ورجع لأوراقه مرة أخرى

- اختفت الابتسامه من على وجهها ونظرت له بحدة فكلامه

يحمل الكثير من المعانى

- يعنى ايه؟

- هو حضرتك كنتى عاوزانى في ايه؟

حاولت التظاهر بالهدوء وأجابته :

-ولا حاجه لاحظت انك بتحضر كل المحاضرات وبتكتب كل

كلمه ورا الدكاتره فكنت عاوزه اشترى منك كشاكيل المحاضرات

والسكاشن

نسيت كامليا انها هى المعجبة به وانها هى من تسعى وراءه

غلبها كبريائها فلم تحسن اختيار الكلمات
 -اسف ممبعش محاضرات وهم بالانصراف
 شعرت كامليا انها قد أهانتة بدون أن تقصد فحاولت تدارك
 ذلك أسرع فوقفت أمامه قبل أن يغادر
 -أنا أسفه مكنش قصدى طيب ممكن أخذهم أصورهم
 واجيبهملك تانى؟
 -اتفضلى ده كشكول الجنائى وبكره أجيب لحضرتك الباقي
 - بلاش حضرتك دى بقى احنا مش زمايل واصحاب
 -لا وملم أوراقه واتصرف
 -تركها وقد اذداد حنقها وغضبها منه ولكنها اذادت اصرار أيضاً
 ليس أحمد بالشخص الفظ الغليظ مع الاخرين بالعكس كل من
 يتعامل معه يشهد له بحسن الخلق والادب الجم ولكن لماذا
 هذه الحده معها؟ لماذا لا يعاملها كما يعامل الباقين
 ربما كان حبه لهدى هو السبب؟ لا فهو يعامل زميلاته الاخريات
 معاملة أخرى على الرغم من حبه لهدى
 ربما المشكله الحقيقيه ان كامليا هى الوجه الآخر لهدى..
 انها النقيض تماما غناء فاحش ملابس كاشفه مساحيق تجميل
 مبالغ فيها اين هى من هدى الكادحه المحتشمه التي لم يسمع
 أحد صوتها منذ ان نضجت وصارت أنثى ..

عاد سمير من عمله في المساء كان الجميع في انتظاره حتى يتناولوا العشاء كعادتهم اعتذر لأمه متعللا بالتعب والارهاق دخل غرفته ورمى بجسده على الفراش مد يده في جيبه واخرج منها الورقه الصغير واخذ يتاملها

تذكر حواره مع امال وتعجب كيف استطاعت ان تتلاعب بعقله وهو يدرك تماما غيره الفتيات من بعضهن في هذا السن كيف استطاعت التأثير عليه وتشكيكه في ورد معشوقته من الصغر قرر ان يتصل بها فقط ليثبت لتلك الواشيه ان ورد ليست كما قالت امسك بالهاتف وطلب رقمها :

- الو

ردت بصوت انثوى مثير فهي تعلم ان رقم غريب قد يعنى زبون جديد

- ورد؟؟؟ سألها مغيرا نبره صوته

-ايوه ورد مين معايا؟

ابتلع لعابه وبدا جبينه يتصبب عرقا:

-ايه هو اسمك سر؟؟

لم يعرف سمير بما يجيبها كيف ترد على غريبا بهذه الجرأة ولكنه قرر الاستمرار : انا على

- انا شفتك قدام المدرسه وعجبتيني اوى وعاوز نتعرف

كان صوت ضربات قلبه اعلى من نبرة صوته المليئة بالأم والحسرة

- بس يا على انا تمنى غالى اوى واكيد الى اداك الرقم قالك إلا

صحيح مين ادالك الرقم؟

- لم يرد سمير وبقى صامتا :

- الو الو انت رحت فين؟

- معاكي بقولك ايه؟ انا عاوز اشوفك

- ماشى معاك عربيه ولا هنقضيه سنكحه ف الشارع

لا معايا عربيه أجابها بصوت مختنق :

- حلو اشوفك فين وامتى؟ اجابته بحماسه

- بكره الساعة ١١ قدام محل الموبيلات اللى فى وش مدرستكم

- ماشى يا سى على نزوغ من المدرسه عشان خاطرک

اغلق سمير الهاتف وقد تاكد ان امل ليست كاذبه كما نعتها

وان ورد ليست كما تخيلها تحس سمير بالندم الشديد لأنه لم

يمزق الورقه ليته لم يقابلها ولم يسمع منها ليته لم يتصل بورد

ليته ظل على ظنه بها فكثيرا يكون الافضل لنا العيش ونحن

نجهل بغض الأشياء التي لو عرفنا حقيقتها لمتنا الما

بينما هو فى غرفته ينهى قصة لم تبدأ مع ورد كانت هدى فى

غرفتها تنسج قصه أخرى مع شادى بعد أن قررت ان تتصل به

لتشكره على هديته فامتد الحديث بينهما الى الفجر اسمعها كل

ما تمنت ان تسمعه من قبل أما بالنسبه له كان الحديث مملا

ورتيبا ومكررا فلطاما أسمع له للكثيرات ..

فى الغرفة المقابلة كانت جميلة ممددة على فاشها وعيناها

متسمرتان على صورة معلقة ع الحائط صوره زفاف صورة هى

كل ما تبقى لها انتابها شعور غريب شعور بالاشتياق له تمنت

لو أنه بقى بجانبها حتى لو كان مجرد جثه بلا روح ..
استيقظ الجميع مبكرا ارتدت هدى ملابسها مسرعة وانطلقت
لعملها كان أحمد في انتظارها مشى خلفها حتى تأكد انهم
ابتعدوا عن الأعين فنادها

-صباح الخير يا هدى

نظرت خلفها متعجبه :

-ايه يا أحمد انت ماشى ورايا؟

-ماشى وراي؟أبدأ أنا بس حبيت أسلم عليكى عامله ايه؟

-الحمد لله تمام انت ازيك؟

-انا كويس وهبتدى شغل من بكره مع واحد صاحبتى

-والله ربنا يوفقك

-نظر لها أحمد متعجبا من رددوها المقتضبة ولكنه استمر

امبارح فاتحت والدتى انها تكلم خالتى جميلة و تطلبك بس

هى

توقفت هدى عن السير فجأة ونظرت له :

-ايه وقفتى ليه؟

أبدأ بسمعك اجابته وهى متوترة

-اه بس هى قالت بلاش دلوقتى عشان الوقت مش مناسب

عشان وفاة والدك

ابتلعت هدى ريقها الذى جف وردت مسرعة :

-اه اه بلاش دلوقتى خالص الوقت مش مناسب ردت وكأنها تزيح

عبا ثقيلاً عن صدرها

-طب انا بس حبيت اقولك صح كنت عاوز اسالك
-مش وقته يا أحمد والنبي أصلى مستعجله أوى
-لم تمهله هدى ان يكمل جملته واسرعت للجانب من الشارع
وقف أحمد ينظر لها متعجبا من تغيرها المفاجى ولكنه اقنع
نفسه بأنها مازالت حزينه على وفاة والدها ومضى هو الآخر
ليلحق بمحاضرتة ..

دقت الساعة العاشرة والنصف نهض سمير من فراشه لم ينم طيلة الليلة فقد لاحت له فكرة راقته له كثيرا ربما الرقم الذى اتصل عليه لم يكن لورد ربما هى مكيدة من زميلاتها فهو لم يسمع صوتها من قبل فى الهاتف ربما احدهم تحاول تقليد صوتها مازال هناك أمل سوف يذهب وينتظر ليرى..

ارتدى ملابسه مسرعا ومضى اختبئ بعيدا وظل يراقب ويتمنى الا تظهر ورد ..

تخطت الساعة الحادية عشر والرابع نظر ف الهاتف متمتما :

- كفاية كده ده أكيد مقلب وهم بالإنصراف

فجأه رن هاتفه نظر الى الشاشة فوجدها تتصل نظر حوله حتى رآها قادمة تبحث عنه تسمرت عينه على شاشه الهاتف وقلبه ينتفض بداخله ضغط على زر الإجابة..

-الو ايه يا سى على انت فىين؟ انا عند محل الموبيلات

-اغلق الهاتف وللحظه تحولت ورد الى أكثر شخص يكرهه فى حياته

رجع سمير الى البيت فتح الباب وما ان رآته جميلة حتى بادرتة

-كنت فىين يا ابنى ؟

-الله يخليكى يامه أنا تعبان وعاوز أنام واتجه ناحية غرفته

-يا ابنى بندق بعث عيل صغير بيقولك المعلم باعته مشوار ومفيش حد فى القهوة

وبدون أن يدعها تكمل أجابها :حاضر

رجعت جميلة للمطبخ وانشغلت فى التنظيف واعداد الطعام مر

بعض الوقت ثم سمعت طرقا على الباب

-مين؟ سألت من وراء الباب

-سماحة يا ست جميلة افتحي

تسمرت للحظه في مكانها اختلطت مشاعرها فرحه بقدمه

واصراره على رؤيتها خائفه أن يراه أحد وهو يدخل بيتها غاضبه

من هذه الجرأة التي يتصرف بها : محدش هنا يا معلم

-جري ايه أم سمير هو احنا عيال صغيرين هتخافي تفتحي الباب

-أجابته وهى مازالت وراء الباب قول الى انت عاوزه يا معلم أنا

سمعك أجابته بإصرار

-بشوقك أنا جايلك فلوس من شهرية سمير بدل ما ياخدهم

ويصرفهم

فتحت شراة الباب لتأخذ منه المال فمد يده وفتح الباب من

الداخل حاولت منعه لكنه دخل وأغلق الباب وراءه بالمفتاح

نظرت له بغضب وهى غير مصدقة لما يفعله

-جري ايه يا معلم؟ ايه اللى بتعمله ده؟

جلس على الكرسى المقابل لها وهو يتفحص جسدها المغطى

دائما بالسواد ولم يرد

-اطلع بره يا معلم ولادى ممكن يجوا فى أى وقت

متقلقيش أنا عامل حسابى هدى بترجع ٨ وسمير زميله مشى

ومش راجع دلوقت خالص وفتحي ادبته جنينه هيشغله طول

النهار يعنى متخافيش محدش هيجى دلوقت

-طب اطلع بره بقى بدل ما أصوت وألم عليك الناس

نظر اليها مبتسما وأجابها ببرود : صوتي
وقفت جميلة حائرة لا تدري ماذا تفعل كانت تستطيع أن
تصرخ وتستغيث بجيرانها لكنها لم تفعل..
أحس سماحة أن الوقت أصبح مناسب لفعل ما يريد..
قام من مقعده وجذبها من يدها وأدخلها غرفتها وأغلق الباب
حاولت منعه لكنها لم تصرخ القاهها على الفراش فحاولت النهوض
لكنها لم تصرخ..
قاومته في البداية لكنها سرعان ما استسلمت بعد ثواني قليلة ولم
تصرخ ..
جميلة ليست قديسة وليست شيطانه أيضاً هي فقط امرأة لم
ينجح فقرها ولا عجز زوجها ان يقتل شغفها ..

دخل أحمد الى الجامعه مسرعا فالיום اخر يوم قبل ان يبدأ في عمله ولا بد ان يرتب مع زملائه تقسيم حضور المحاضرت حتى لا يفوته شئ جلس في الكافتريا منتظرا حضورهم رأته من بعيد فأقبلت نحوه

صباح الخير يا استاذ أحمد قالتها وهي تتصنع الجدية لم يرفع عينه في اتجاهها فقد عرفها من صوتها..

-صباح النور يا أستاذة كامليا

جلست علي المقعد المقابل وقد بدأ صبرها ينفذ من بروده:

-جبت بقية المحاضرات؟

-ايوه اتفضلي بس يا ريت متاخرهمش عشان بذاكر منهم

-مممكن أعرف انت بتعاملني كده؟

بدون أن يرفع عينيه أيضاً أجابها :

- بعاملك طبيعي جدا

-لا طبعا انت بتتعمد تهيئني وتجاهلني أنا كنت فاكرة انك

كده مع الكل بس شفتك بتتعامل عادى جدا مع بقية البنات

مممكن أعرف السبب؟

سكت أحمد ولم يجيبها..

- أنا بكلمك علي فكرة ومصممة أعرف

-أقولك ومتزعليش؟

-لا مش هزعل

-عشان انتى انسانه فاضية متزوفة من بره بس فاضية من جوه

وانا مبجش اتعامل مع النوع ده من البنات انا بفضل

قاطعته كامليا بغضب :

-انت ازاي تسمح لنفسك تحكم عليا ؟ انت تعرفنى؟ اتعاملت

معايا عشان تعرف انا فاضيه ولا لا

-مش لازم أعرفك على فكرة مظهرك وتصرفاتك كفاية وبعدين

دى حياتك وانتى حرة فيها وده رأيي وانا حر فيه..

عن اذنك وهم بالانصراف ولكنها اوقفته بحزم:

-لا يا استاذ استنى مدام حضرتك اشتغلت قاضى يبقى لازم

تسمعنى كويس انت مش حر تصنف الناس براحتك لازم الاول

تعرفنى وبعدين تحكم عليا

بدأت كامليا تروى له تفاصيل حياتها وكيف هى بين أب وأم

يعيشون فى بيت واحد لكنهم منفصلين جسديا ومعنويا فالأب

دائما فى عمله لا يفكر إلا فى صفقاته وأمواله والأم مشغوله

بأصدقائها والنادى وسيدات الجمعيات الخيرية..

عمرى ما حد اتكلم معايا عمر ما حد قالى حاجه عن لبسى

ولا مكياجى عمرى ما حد نصحنى حتى مليش أصحاب كلهم

أصحاب خروجات ونوادى..

وعلى فكرة أردفت ولكن بحدة أكثر :

-انا عمرى ما غلطت واتحدى أى واحد هنا يقول انى خرجت

معاه أو بكلمة حتى كلهم حاولوا وفشلوا..

دى بقى أنا يا حضرة القاضى لو لسه شايفنى فاضية فرأيك

أصلا ميهمنيش وتركته ومضت ..

لم يعقب أحمد على أى كلمه قالتها ظل يفكر فيما يسمع لم

يتوقع أبداً ان يتجرأ متهم ويجادل قاضيه بعد ان اصدر حكمه عليه ليتهما لم تحكى له شئ ليتهما ظلت في عينيه الفتاة المدللة اللعوب لم يعد من حقه الآن الاستمتاع بالجلوس على كرسيه المفضل .

مرت أسابيع وتفكك البيت الذى طالما حاولت جميلة أن تبقيه متماسكا ... لم تعد تستطيع أن تجمعهم حولها كما اعتادوا فما أن تعود هدى حتى تتحجج بالتعب والارهاق لتدخل غرفتها لتبدأ حديثا طويلا مع شادى نافذتها الوحيدة المطلة على الحياة اصبح لا يمر يوما بدون ان يتحدثا سويا عن أى شئ وكل شئ فهو بارع جدا فى ايجاد المواضيع التى تحبها. أما سمير فيرجع من عمله ليدخل غرفته أيضاً ويقضى ليلته فى الشرفة مراقبا اياها فى صمت فبعد ما حدث لم يستطع ان يكره ورد حاول كثيرا ولكنه فشل..

أما جميلة فقد بقت وحيدة طوال الوقت حبيسة غرفتها معذبة بين تأنيب الضمير والنشوة التى شعرت بها معه أحيانا يتغلب عقلها فتظل تستغفر الله ليلا وتعاهده على التوبة ونسيان ما حدث وأحيانا أخرى تنتصر هى فتنام وهى عازمه على أن تذهب له وتكون ولو لبعض الوقت امرأة.

صباح يوم الجمعة استيقظ الجميع مبكرا وجلسوا سويا لتناول الافطار تنفيذا لرغبة أهمهم التي أصرت على ذلك..
جلسوا جميعا بأجسادهم أما عقولهم فكانت في أماكن أخرى..
أحست بشرود أبنائها فحاولت مداعتهم...

عارفين يا عيال عندي عروسة بتجهز هدموم فرحها بس ايه
تخينة أوى شكلها هيبقى مسخرة في فستان الفرح ..
وأخذت تضحك بصوت عالي كما لم تفعل من قبل ..

نظرت هدى لأمها التي تمننت طويلا أن تراها تبتسم فقط وهي
الآن تضحك من قلبها فضحكت بصوت عالي كما لم تفعل من
قبل فضحكت هي الأخرى وابتسم سميير ابتسامته الباهتة فقط
ليثبت وجوده معهم في حين قال فتحي ...

هتبقى شبه خالتي فتحيه بتاعت الخضار ..
ضحك الجميع فقد أجاد فتحي التشبيه نظرت جميلة لسمير
وضربته على كتفه مرددة ...

-يا ابني اضحك هو الضحك بفلوس ...
في الصباح ارتدت هدى ملابسها بسرعة ونزلت لمقابلة شادي
الذي اقنعها أنه يريد أن يتحدث معها في أمر مهم لا يحتمل
التأخير..

نزل سميير أيضاً لعمله وانشغل بتجهيز المكان للزبائن الذين
اعتادوا الحضور بعد الصلاة وبينما هو منشغل تسلل لأذنه
صوت الخطيب وهو يصرخ في المصلين ويحثهم على الاجتهاد
في العبادة ليفوزوا بالحدود العينية التي ينتظرون في الجنه كان صوته

جافا غليظا لكنه أثار انتباهه فتحي لأول مرة..

ايه يعنى لو عندك مشاكل فى دنيتك؟ ايه يعنى لو مش لاقى
تاكل وتاكل عيالك؟ ايه يعنى لو صليت فى اليوم ٥٠ صلاة مش
٥ بس ...

كفايه تبقى قاعد فى الجنة كده وحواليك ٧٠ واحدة من الحور
العين دى تلاطفك ودى تلاعبك ودى لامواخذه يعنى لا حياء فى
الدين قاعده فى حضنك...

آه لازم يا اخوانا تجتهدوا وتعرفوا ايه اللى مستنيكم لو أطاعتوا ربنا
وأخذ الشيخ يسهب فى شرح مقدار القوة الجنسية للرجل فى
الجنة وبكارة زوجاته المتجدده دائما..

شايفين المتعة يا اخوانا؟؟

تظاهر سميمير بالانشغال فى العمل لكنه كان منصتا للشيخ بكل حواسه
فجأه ترك كل شى وخرج مسرعا:

-على فين يا عم انت؟ صاح زميله بندق

-رايح اصلى وهروول خارج القهوة

-تصلى؟ تمتم زميله متعجبا

دخل سميمير المسجد لأول مرة فى حياته جلس فى الصف الاخير
يستمتع للخطيب وهو مازال يصف حسن وجمال الحور العين
اقيمت الصلاة ووقف سميمير يقلد حركات المصلين حتى فرغوا ثم
ذهب وجلس بجانب الإمام ..

-صباح الخير يا مولانا

-يابنى قول السلام عليكم صباح الخير دى ايه؟

- حاضر السلام عليكم يا مولانا رد سمير بدون ان يفهم الفرق
بين الاثنين فكلاهما تحيه
-انت ابن المرحوم عبده مش كده؟
-ايوه يا مولانا
-الله يرحم ابوك ويسامحه بقى عمره ما ركعها
صمت سمير برهه ثم سأل:
-مولانا انا سمعتك وانت بتتكلم عن البنات اللى فى الجنة و (...)
-اسمهم الحور العين يابنى
-اه اه الحور العين هو صحيح كل واحد هيبقى ملكه ٧٠ بنت
قصدى حور عين
لمح الامام فى عيونه الرغبه والحرمان فأجابه بعد ان أحس أنه
امام صيد جديد
-اه طبعا يا ابنى بس مش لأى حد
-طب اعمال ايه عشان يكونوا عندى فى الجنة
-ولا حاجه تلتزم بسنه النبى عليه الصلاة والسلام
سكت سمير برهه ثم اردف:
-ايوه يا مولانا يعنى اعمال ايه؟؟
-اخذ الامام يعدد لسمير سمات المؤمنين المتبعين لسنه الرسول
من حلق الذقن وتقصير الثياب والمواظبة على صلاه الجماعة
انصت سمير بفرحه ثم سأل
-بس كده ؟ ويبقى ليا ٧٠ واحده فى الجنة؟
-لا يابنى فاضل اهم حاجه لازم تكون عضو فى جماعة يعينوك

على فهم دينك

-طيب ماشى انا موافق

-مش بالسهولة دى يا بنى لازم مولانا يشوفك ويقعد معاك

وبعدين ينظر في أمرك

-طيب نروحله دلوقتى رد عليه سمير بحماس

-نظر له الإمام مبتسما وسعيدا بالصيد الجديد يابنى العجلة من

الشیطان أنا هكلمه عنك ولو وافق يقابلك هاخذك ونروحله ان

شاء الله

-ماشى يا مولانا هعدى عليك بكره تكون كلمته

-بكره؟؟ ليه يا بنى انت مش هتيجى تصلى معانا العصر

والمغرب والعشاء ولا ايه؟

-اه طبعا طبعا يا مولانا اجابه بامتعاض

هم سمير بالنهوض ومغادره المسجد لكنه رجع وجلس مرة

أخرى امام الشيخ بعد ان تذكرها..

-مولانا لو واحد بيحب واحده أوى ينفع تبقى من الـ ٧٠ ست

قصدى الحور دول..

-طبعا يا بنى اجابه الشيخ زوجة المومن هى سيدة الحور العين

-بس يا مولانا هى ... صمت سمير ولم يشأ أن يثقل على الشيخ

حتى لا يمل منه فابتسم وغادر ..

- جلس شادى فى السيارة منتظرا قدوم هدى وما أن رآها حتى
خرج من السيارة وفتح لها الباب منحيا
ابتسمت فى خجل وسألته :
- هو انا هقعء جمبك؟
-لا اقعدى ورا وتبقى انتى الست هانم وانا السواق اجابها وهو
يضحك
- لا خلاص احنا هنروح فىن؟ أصل انا مينفعش
قاطعها مسرعا:
-هش انتى النهاردة معايا مفيش اسئله
-حاضر
-نظر اليها مبتسما بس هقولك برضو عشان خاطر عنىكى الحلوة دى
-بصى يا ستى هنروح نشترى فستان شىك اوى لحضرتك وبعدين
هعزمك على الغدا وبالليل نروح سينما ها فى أى اعتراض على
الخطه؟ سألها ممازحا
-دخلا محل الملابس وبدا هو فى اختيار الثوب لها
-ايه رأيك تقيسى ده؟ ومد لها أحد الأثواب
-يا لهوى لا ده قصيرأوى مقدرش البسه اجابته بانزعاج شديد
-وطى صوتك يا هدى الناس بتتفرج علينا أجابها بحدة خدى
الفستان قيسيه..
-أخذته منه بتردد ودخلت غرفه تغير الملابس وارادتته ولكنها
لم تجرأ على الخروج به..
-ايه يا بنتى انتى نمتى جوه؟ نادها بعد أن مل من الانتظار

-مش هعرف أطلع كده ..الله يخليك اختارلى حاجة تانية
 -اطلعى ياهدى بدل ما اسيبك وامشى قالها بنبرة أكثر حدة
 -خرجت من الغرفة على استحياء واخذت تجذب الثوب لأسفل
 محاولا تغطية سيقانها المكشوفة وما أن رآها حتى صاح
 -واو إيه الحلاوه دى يخرب بيتك...
 -أنا عمرى ما لبست كده وحسه كل الناس بتبصلى ردت وهى
 على وشك البكاء..
 -تظاهر شادى بعدم سماعها وأخذ يعدل لها شعرها المنسدل
 على كتفيها ..
 -الفتستان تحفة ومحدث بيص عليكى ولا حاجة
 -ابتسمت هدى محاولة إرضائه وإخفاء الانزعاج البادى على
 وجهها إختار لها أيضاً الحذاء والحقيبة وخرجا من المحل
 لتناول الغداء..
 وصلا للمطعم وجلسا فى انتظار الجرسون
 -تحبى ناكل ايه؟ سألها وهو يتفحص قائمة الطعام
 -مش عارفة انت اختارلى
 -ماشى يا قمر و اشار بيده للجرسون
 -ادى يا سيدى الناس اللى عايشه عيل مدلع بعربية وفلوس
 وكل يومين واحدة جديدة ناس ليها بخت صحيح قالها أشرف
 وهو يشير لهدى وشادى..
 -لم يرفع أحمد عينيه لانشغاله بتحضير الطلبات حمل الطلبات
 بعنايه وذهب لوضعها على الطاولة وقعت عينه عليها تسمر

مكانه غير مصدق هل هدى حقا بهذه الثياب الفاضحة
 وشعرها المكشوف؟ ومن هذا الغريب الجالس معها؟ ربما
 هذه الفتاة تشبهها فقط؟ ولكنه عندما رأى ارتباكها تأكد من
 أنها هدى وضع الأطباق ومضى مسرعا..

-يا نهار اسود صرخت هدى وهى تضع يدها على وجهها..

-ايه يا هدى فيه ايه؟ نظر اليها متعجبا

-يلا نمشى يا شادى وهمت بالقيام

-جذبها من يدها منفعلا بقولك فى ايه؟

-أصل الجرسون ده جارنا أجابته باضطراب

-وايه المشكله بقى

-ايه المشكله؟ هيروح يقول للحارة كلها وهتبقى فضيحة

-اعتدل شادى فى جلسته

-لما يقولهم ويسألوكى ابقى قوليلهم ده بيحبنى وهنتخطب

قريب

-طب معلش والنبى لازم نمشى مش هعرف اقعد

-ماشى يا هدى ولو انى مبحش النكد قالها بتأفف وانصرفا...

جلست جميلة في البيت مع فتحي وهو يشاهد التلفاذ.. شيئ ما بداخلها كان يدعوها للخروج لرؤيته ولكنها تتراجع في آخر لحظة

حاولت أن تشغل نفسها بأي شيئ لتتخلص من هذه الرغبة الملحة قامت بغسل جميع الأطباق والأواني حتى التنظيف منها أعادت ترتيب جميع الملابس في الدواليب جلست تشاهد الفيلم المعاد للمرة المائة لكنها لم تستطع .

كل ٥ دقائق كانت تنظر من الشباك لتتأكد من وجوده وما أن رأته جالس أمام القهوة بلا وعى ارتدت عباؤها وخرجت مسرعة خشيه أن يردها عقلها مرة أخرى..

نزلت الدرج مسرعة كأى فتاة مراهقة تركز ل ترى من تحب لم تعد تريد ان تسمع لصوت عقلها وهو يذكرها أنها أم لثلاث أبناء وأنها على مشارف الأربعين لم تعد تسمع إلا صوت رغبتها في أن تراه وترى كيف ينظر اليها وان تسمع صوته..

لم تشعر إلا برغبتها في ان تكون معه بين احضانه يفعل بها ما يشاء تبا لعقلها وللناس ولضميرها اليقظ طوال الوقت مشت بخطوات هادئه في اتجاهه نظرت اليه ففهم انتظر قليلا

ثم تبعتها

-جميلة؟

-التفتت له وأجابته نعم

-رايحه فين؟

-لم تجيبه ثم تابعت انا كنت رايحه اشترى

-لم يدعها تكمل جملتها وبادرها وحشتك؟

-طب وأخرتها يا معلم سألته بارتباك
-بقولك ايه كلمه يا معلم دى لما نكون وسط الناس لكن بينى
وبينك سماحة بس وبعدين أخرة إيه إحنا لسه فى أولها
سكتت لبرهه وكأنها تحاول ترتيب الكلام المتناثر فى عقلها
فبادرها مسرعا :

-شوفى أنا راجل عازب وانتى ست وحدانية ومعششة فى نفوخى
من زمان سيبها لظروفها انبسطنا مع بعض نبقى نشوف
هانعمل ايه؟ زهقنا ادينا مخسرناش حاجه
ابتسمت له ابتسامة باهتة وهزت رأسها وهمت بالانصراف
ولكنه استوقفها :

-بقولك ايه انا عاوز أشوفك لوحدنا
-ايه رأيك استناكى بكرة فى شقتى الساعة ٢ يكونوا كل ولادك بره
-حاضر هشوف وتركته ومشت

تنهد سماحة تنهيدة المنتصر الذى ظفر بما يريده للحظات رجع
بذاكرته للوراء عندما احبها حبا شديدا وذهب ليطلبها لكنه
رفض لسوء سلوكه وعلاقته المشبوهه بتجار المخدرات عندما
فضلوا عليه عبده لحسن سيرته بين الناس ولكنه لم يياس ولم
يفقد الأمل والآن كان له ما تمنى.

تعددت اللقاءات بين جميلة وبين المعلم سماحة وفى كل مرة كانا
يتفقان على الموعد الجديد استطاع أن ينسيها سنوات الحرمان
حتى أصبحت كالدمية بين يديه لكنها كانت سعيدة فرحة
برجوعها امرأة من جديد.

منهمكا في عمله سمع سمير صوتا يناديه من خارج القهوة فنظر
فإذا طفلا صغيرا .

-ايه يلا عاوز ايه

-اقترب الولد الصغير منه وهمس

-الشيخ عبد الرحمن عاوزك في الجامع

حاضر اجابه سمير مسرعا

بندق خمساياه وراجع اشار سمير لزميله وهو يغادر القهوة

توقف سمير امام الجامع لا يدري بما سيوجب الشيخ اذا سأله
عن عدم انتظامه في الصلاة معهم ولكنه قرر الدخول بعد ان

وجد الحجه المناسبة

-السلام عليكم يا مولانا

-وعليكم السلام يا بنى ليه مش منتظم في الصلاة يا سمير

-أصل يا مولانا انا وصحابي بنصلى جماعه في القهوة عشان ناخذ

الثواب ومنسبش القهوة لوحدها

-نظر له الشيخ بارتياح لكنه اومئ له براسه

خير يا مولانا؟

-ولا حاجه انا كلمت أميرنا عنك وعن حماسك لخدمه الدين

وعاوز يشوفك

-بجد طيب نروح دلوقتي؟

- على بركه الله

اخذه الشيخ بيده وخرجا سويا من المسجد وأوقفا سيارة أجرة
وانطلقا وصلا الى فيلا كبيرة على أطراف القاهرة فيلا فخمة

يحوطها سور كبير من الأشجار
 -السلام عليكم قول للأمر أننا بانتظاره موجه كلامه للحارس
 -حاضر اتفضلوا
 دخلا الى حديقته الفيلا وجلسا ينتظران وما ان رآه الشيخ عبد
 الرحمن حتى ركض اليه مسرعا وانحنى ليقبل يديه..
 - السلام عليكم حياهم الشيخ عمر بصوته الرخيم
 -ده ابننا سمير اللى كلمتك عنه يا مولانا .. حب على إيد مولانا
 يا سمير ونغزه فى كتفه ..
 ارتبك سمير ولم يحرك ساكنا فهو لم يعتد على أن يقبل يد أحد
 من قبل
 -نغزه الشيخ مرة أخرى بوس إيد مولانا يا سمير عشان تاخذ
 البركة
 -انحنى سمير لأول مرة وقبل يده
 - اتفضلو استريحوا وأشار لهم بالجلوس وهو يتأمل سمير بعينه
 -الشيخ عبد الرحيم قالى انك عاوز تنضم لينا مظبوط؟
 -ايوه أجابه سمير بتلعثم
 -ليه؟
 -ارتبك سمير ولم يرد واكتفى بالنظر للشيخ عبد الرحمن
 -أصله يا مولانا حاول الشيخ عبد الرحمن الإجابة عن سمير
 انتظر و اشار له الشيخ عمر بالتوقف:
 -عاوز تنضم لينا ليه يا بنى؟ موجهها كلامه وبصره لسمير
 -عشان أقرب لربنا اكثر و (...)

قاطعته الشيخ عمر بأصبعه الذي بدأ ينقر به على الطاولة
أمامه محاولا حث سمير على قول الحقيقة :
-قول مولانا الحقيقة يا سمير مفيش كذب في حضره مولانا رد
الشيخ عبد الرحمن بسرعه بعدما فهم إشاره عمر
ظل سمير صامتا فتره ثم أجاب بصوت متقطع:
- عشان سمعت الشيخ عبد الرحمن في الخطبة بيقول ان الواحد
بيكون له ٧٠ واحده ست في الجنة
ابتسم الشيخ كونه يعرف الاجابه مسبقا:
- طيب يا سمير طبعا احنا لازم نختبرك الأول عشان نتأكد من
قوة إيمانك وارادتك وبعدين نقرر
هز سمير رأسه بالموافقة :
تقدروا تفضلوا قالها ووقف :
هب الشيخ عبد الرحمن واقفا وجذب سمير من يده بسرعه :
-يلا يا سمير مش عاوزين نعطل مولانا اكثر من كده
ومشيا بعد ان قبلا يد عمر
خرجا الى الشارع ثم سمع سمير صوت سياره تفتح بالريموت
-يلا يا سمير اوصلك في سكتي
دى عربيتك يا شيخ ؟ سأله متعجبا
-ايوه رد الشيخ باقتضاب
-بس انا عمري ما شفتك راكبها في الحارة قبل كده
ابتلع الشيخ لعابه قبل ان يجيب
-عشان يا بنى بحب اراعى مشاعر الناس في الحارة وان شاء الله

لو عجبت الامير ورضى عنك هيبقى عندك عربيه زيها وبيت وكل
الى نفسك فيه
-ابتسم سمير بفرح
-انا هنزلك قبل الحارة بشويه كده عشان الناس بس
-اه اه طبعاً يا مولانا
تعددت اللقاءات بين سمير والشيخ عبد الرحمن كلفه فيها
بذاء بعض المهام الصغيره كتوصيل مبالغ مالية لبعض الأشخاص
وأحياناً عمليات تبديل عملة بحجه اختبار ثباته..
في هذه الأثناء استطاع الشيخ عبد الرحمن ان يتوغل داخل عقل
سمير ضاغطاً على احتياجاته التي يعلمها جيداً حتى بات يطيعه
في كل ما يقول ويمثل لأوامره أياً كانت ..

تعددت لقاءات جميلة والمعلم سماحة حتى باتت بشكل يومي
أصبحت تذهب اليه يوميا بعد أن يخرج أولادها فتقوم بإلهاء
فتحي ببعض النقود ليشتري الحلوى ثم تذهب لتمضي الساعات
معه تلهو وترقص وتغنى وتعيش ..

- سماحة خاطبته وهي نائمة على صدره باستكانة

- نعم أجابها وهو يحتويها بين ذراعيه

- إوعى تسبنى بعد ما عودتنى عليك إوعى ترجعنى لعيشتى
القديمة

- اسيبك ليه؟! طول ما احنا مبسوطين عمري ما هسيبك ... ولو
قمتى رقصتى دلوقتى وانتى عريانه كده هديكى شهادة ضمان
٥ سنين قدام ..

- لاردت بدلال

- قومي بقي وجذبها من زراعها

قضى أحمد أيام يراقب هدى ترك عمله الذى سعى له بحماس ليتفرغ لذلك رآها وهى تركب سيارة شادى يوميا بعد عملها .. رأى ابنته التى لم يحسن تربيتها وهى تسقط أمام عينيه وفى نفس الوقت كان يلمح تغيرا واضحا فى سلوك كامليا التى بدأت تغير من ملبسها وطريقتها فى التعامل مع الآخرين فدفعه الفضول ان يسأل أشرف عنها..

- هى الأميرة ديانا بتاعتكم اتحجبت؟ قالها وهو يتظاهر بالسخرية

- اه انت معرفتش؟ أصلها اتخطبت

- اتخطبت؟ غريبه

- ليه يا عم؟ ده الغريبة انها مكنتش لسه اتخطبت

- واكيد طبعا اتخطبت لواحد مليونير من طرف ابوها

- خالص بقه دى اتخطبت لدكتور وليد المعيد بتاع المدنى

- مستحيل بس ده ملتزم ازاي قبل يرتبط بيها

- وايه اللى يمنع هو قعد معاها كذه مرة وناقشها فى لبسها

وطريقتها وهى اقتنعت واتغيرت

صمت للحظه محاولا استيعاب ما سمع ثم أفاق من شروده

على صديقه وهو يربت على كتفه :

- ايه مش هتحضر الجنائى؟

- اه طبعا وانطلقا للمدرج ..

وقف سمير أمام المرأة يسرح لحيته التي أطلقها كما طلب منه الشيخ عبد الرحمن ثم انطلق مسرعاً بعد أن تأكد أن البنطلون الذي يرتديه لا يتعدى كعب رجليه فهو على موعد هام مع الأمير..

استقلا سيارة أجرة كانت تنتظرهم على الشارع العمومي جلسا في الحديقة في انتظار الأمير.. ما أن رآه سمير قادما حتى هب واقفا وركض اليه وانحنى ليقبل يديه بدون أن يدفعه الشيخ عبد الرحمن لذلك ..

-ازيك يا سمير عامل ايه يا ابني؟

-كويس برضاك يا مولانا

-شفت لما اطلقت لحيتك وشك نور ازاي

-بفضل دعواتك يا مولانا

رمقه الشيخ عمر مبتسما فرحا بنتائج غسيل المخ الذي أجراه له الشيخ عبد الرحمن ..

-بص يا سمير انا امبارح كنت بتكلم مع الشيخ عبد الرحمن بخصوصك واختناك لمهمة دقيقة فهل انت مستعد ولا نشوف حد تاني

-طبعا مستعد يا مولانا

-اصبر لما تعرف المهمة وبعدين تقرر

صمت سمير بعدما شعر بثقل المهمة المكلف بها وانتظر حتى يكمل الأمير

-طبعا يا سمير انت عارف ان كلنا هنموت بس مش ده المهم

المهم هنموت ازاي كل يوم في الآلاف بيموتوا لكن كام واحد منهم بيموت في سبيل دينه وعقيدته؟!
توقف الشيخ عمر لحظه يراقب فيها وجهه وانفعالات سمير ثم استطرده :

- انت عارف ياسمير ان كان في صحابي في غزوة من الغزوات وسأل النبي ابي اللى بينى وبين الجنة النبي قاله تموت في سبيل الله فتدخل الجنة ..

يعنى لحظة انت في الدنيا بقرفها بالناس الاشرار اللى فيها بالفقر والحرمان واللحظه اللى بعدها انت في الجنة حواليك ٧٠ حورية تلعب مع دى وتضحك مع دى وتعاشر دى ...
لحظه تنتقل فيها من جحيم الدنيا لنعيم الآخرة وبعدين احنا كده

-انا موافق يا مولانا قاطعه سمير فجأة :

- موافق على ايه يا سمير

موافق انى اسيب الدنيا واروح لنعيم الجنة

-بس ده معناه انك تموت يا سمير

-كلنا هنموت يا مولانا وانا اتمنى الشرف ده

لم يكن سمير متشوقا للشهاده ولا لنيل شرف الجهاد كما أخبرهم ولكن ان كان هذا هو الطريق الوحيد اليها فليكن نعم هو يحبها كل هذا الحب ما المانع أن يموتا ثم يجتمعا في حياة أخرى بلا متاعب أو مشاكل فليكن الموت اذا لتكن الحياة بعده.

-أخذ الشيخان يشرحان لسمير طبيعة المهمة وهى تفجير ملهى

- ليلى يتعاطى فيه الناس المخدرات والخمور ويمارسون فيه الرزائل وبيارزون الله بالمعاصى وأنه بتنفيذه لهذه المهمة يساعد فى القضاء على هذا المنكر
- امتى معاد التنفيذ يا مولانا؟ سأله سمير
- بعد بكره الساعة ١٢ بالليل أجابه الشيخ عمر
- أمرك يا مولانا بس أنا ليا شرط
- قاطععه عبد الرحمن بشدة:
- انت هتتشرط على مولانا يا سمير انت ع ...)
- سيبه يا شيخ عبد الرحمن انا عاوز اسمع الشرط يا سمير..

-تعرفى ان بكره عيد ميلادى؟ سأل شادى هدى الجالسة بجواره
 فى السيارة
 -بجد؟ كل سنه وانت طيب
 -وانتى طيبة يا حبيبتى هتحضرى الحفلة طبعاً
 صمتت لفترة ثم سألته: بس هتقول ايه لمدام فريدة؟
 -مدام فريدة؟ اه مانا مش هعمله فى البيت يا روحى أصل
 ماما مش بتحب دوشة عيد الميلااد
 -امال هتعمله فين؟
 - ف بيت واحد صاحبي كل الشله بتاعتى جايه ولازم تيجى
 -لا يا شادى مش هينفع
 -ليه؟ سألها بحدة يعنى عيد ميلادى تحضره كل الشلة والبنات
 اللى بحبها تقولى مقدرش
 -مينفعش ارواح شقة ناس معرفهاش أجابته بصوت مخنوق
 لخوفها ان ينفعل أكثر عليها وتخسره
 -هيكلوكى مثلاً؟ وبعدين أنا معاكى
 -مش عارفة يا شادى أجابت وعينها ممتلئة بالدموع هى
 تعلم خطأ ما ستفعله ولكنها أيضاً لم يعد باستطاعتها مجادلته
 فى أى شئ..
 بكره تاخدى أجازه من الشغل وتروحي للكوافير وتلبسى طقم
 حلو من اللى اشتريناه وهستنكى فى المكان بتاعنا الساعة ٦ ..
 لم يعطها شادى أى مجال للاختيار أو التردد فوافقت بخضوع..
 - حاضر

في اليوم التالي وقف سمير أمام المدرسة في الانتظار وما أن
ملحها حتى ناداها ..

-يووو مش هخلص من أم اللزقه دي؟ قالتها ورد بتأفف اصبروا
دقيقه وراجعة تركت زميلاتها وذهبت اليه

-ايه يا سمير في إيه ؟

-فكرتى يا ورد؟

-في ايه يا سمسم؟

-في موضوع خطوبتنا

-لا يا سمير لسه بفكر متسربعنيش بقى أحسن أرفض والله

-حاضر أنا بس كان عندى خبر حلو ومقدرتش استنى قلت
لازم أقولك

-خبر ايه يا سمسم؟ سألته بلهفه

-في مصلحة كده لو تمت هاخذ فيها ١٠ الاف جنيه وانا كنت
ناوى اديهملك تخليهم معاكى عشان ميتصرفوش

-بجد يا سمير؟ اه وماله هاتهم اخليهم معايا

-مش عاوزه تعرفى ايه هى المصلحه يا ورد؟

-مش مهم مدام فيها ١٠ الاف أنا معاك

ابتسم ابتسامته الباهتة وأخبرها أن تنتظره غدا الساعة
الخامسة أمام الموقف

ليلة أخرى في بيت جميلة الذي أصبح مهجورا على الرغم من الأنوار المضاءة دائما ... مضت فترة طويلة على آخر مرة اجتمعوا فيها سويا على الطعام أغلق الجميع أبواب حجراتهم على أنفسهم ماعدا فتحي الذي جلس يتابع التلفاز في الصالة.. استلقى سمير على فراشه يحلم بالجنة التي تنتظره بعد دقيقة واحدة من قضاءه على أعداء الله والـ ٧٠ حورية اللاتي يتزين له وحده بعد أن قضى كل حياته بدون أن يحب كأي شخص آخر بدون أن يمس يد فتاته التي طالما حلم بها حياة كاملة بلا حياة أخيرا سيذهب لمكان لن يعايره أحد بنواقصه..

أما هدى فجلست تفكر طويلا ماذا سترتدي وكيف ستصف شعرها كيف ستبدو أمام أصدقاء شادى هل ستستطيع أن تأكل أمامهم بالشوكة والسكين كما يفعلون ماذا ستفعل إن حدثوا بالانجليزية التي تجهلها تماما ماذا لو كانوا يشربون الخمر هل ستشرب معهم كي لا يغضب منها شادى..

أما جميلة فقررت أن تفتح سماحة في أمر زواجهم جلست تفكر كيف ستزين له وأى عطر ستضع وكيف ستخبره برغبتها في الزواج منه ولما لا أليس سماحة هو من كان يتمنى الزواج بها منذ زمن بعيد هى تشعر بسعادته معها وهى أيضاً سعيدة بين أحضانه فلما لا؟

وقف أحمد في شرفه منزلهم يراقب الطريق لابد أن يتحدث مع هدى عما رآه ربما كان لديها مبرر أو تفسير للأمر حتى وان كانت أخطأت لما لا يسامحها؟ وهل هناك أحد لا يخطئ .. سيذهب اليها ويعاتبها ويجعلها تقسم ألا تعيد هذا الخطأ مرة أخرى وأن تعود طاهرة كما كانت له هو وحده .. رآها وهي تعبر الطريق فنزل ورائها مسرعا :

- هدى

عرفته من صوته فأسرعت الخطى خوفا منه ولكنه لحقها وأمسك يدها :

-ايه يا هدى بتجري ليه؟

مش بجري أنا بس مستعجله أجابته بصوت خائف ومنتقطع :

- رايحه فين؟

- واحده زميلتى عيانه ورايحه ازورها

- مين الولد اللي كان معاكى فى المطعم

صمتت ولم تجبه واكتفت بالنظر الى الأرض :

-ردى عليا يا هدى أنا ممكن أسامحك بس تقوليلى الحقيقة

-ده مستر شادى ابن مدام فريدة أجابته بصوت خائف

-وايه علاقتك بيه؟

-هننتجوز

-تتجوزوا؟ طب وانا؟ احنا مش متفقين على الجواز لما اخلص

الكلية

سكتت ولم ترد فعاد يسألها :

-بتحبيه يا هدى؟

هزت رأسها بالايجاب

-مممكن اعرف أنا قصرت معاكى فى ايه يا هدى؟ ايه اللى لقتيه

فى شادى ومكنش فىا

لم ترد وعادت لصمتها مرة أخرى

-لو سمحتى يا هدى أجابه السؤال ده تهمنى ومصمم اعرف

اظن ده حقى..

-انا كمان كنت بحبك يا أحمد وكنت بستنى اليوم اللى هنتجوز

فيه بس وانا معاك مكنتش حسه انى سعيده كنت حسه انى

ست عجوزة أوى حياتها بتخلص مش بتبتدى مش فرحانة زى

كل البنات اللى بيحبوا..

القت هدى ما كان بداخلها ثم سكتت فجأة ونظرت له:

-كملى يا هدى كملى متخافيش أنا سامعك

استجمعت قواها مرة أخرى واكملت:

-مع شادى أنا فرحانة بيقولى الكلام اللى كان نفسى اسمعه منك

بنقعد نتكلم فى التليفون طول الليل بيقولى انى حلوة انى أجمل

بنت فى الدنيا بيقولى ان ...) وسكتت مرة أخرى..

صمت أحمد أيضاً للحظات محاولاً إخفاء غضبه وحنقه منها

ثم أردف:

-طيب يا هدى ربنا يسعدك

-يعنى مش زعلان منى؟ سألته وهى مازالت تنظر للارض

-لا أبداً ربنا يهنيكى

ظلا صامتين لفترة ثم استأذنته ومشت

ظل أحمد يتبعها بنظراته والافكار تتصارع في عقله ما بين أن يتركها لما أرادت متمنيا لها السعادة معزيا نفسه أنه ربما يكون هو السبب فيما حدث وبين رغبته في الانتقام منها فما ذنبه هو أيضاً أن يبقى وحيدا وقد كرس كل حياته ومشاعره لها وحدها لم يستطع أن يمنع نفسه أن يتبعها... مشى خلفها بدون أن تشعر راءها وهي تدخل محل تصفيف الشعر قضت فيه ما يقرب من الساعة ثم خرجت منه مرتدية فستان أسود قصير وشعرها منسدل على ظهرها ...

كانت سيارة شادى في انتظارها أمام المحل؟ ركبت بجواره ثم انطلقا..

أشار أحمد بسرعة لتاكسى كان يقف بالقرب من المحل وركب فيه مسرعا.. ورا العربية السوداء دى يا اسطى توقف شادى أمام أحد البنايات الضخمة نزل من السيارة وأسرع بفتح الباب لهدى أحاط خصرها بزراعيه وصعدا معا... وفي لحظات تحول أحمد لشخص آخر لا أحد يدرى هل سقط عنه قناع الملائكة الذى ارتداه طوال حياته أم ان الوجد فعلا قادر على صهر أى ملائكيه بداخلنا

مشى خطوات قليلة لمحل صغير قريب من البناية ثم سأل الرجل العجوز الجالس فيه ..:

- السلام عليكم يا حج

- عليكم السلام يابنى أؤمر

- معلش يا حج في بنت من شويه طلعت العمارة دى مع واحد
اسمه شادى وانا بشبه عليها اوى متعرفش مين دى؟ ودس فى يده
٥ جنيهات ..

- بنت؟؟ يابنى كل يوم بنات أشكال وألوان طالعين العمارة دى
مش بنت واحدة ربنا يابنى يتوب علينا ويهدى كل عاصى..
فهم أحمد إشاره الرجل العجوز جيدا فسكت..

- هى قريبتك يا بنى؟

لم يجيبه أحمد ومضى ..

وقف لدقائق أمام البنايه ثم دس يده فى جيبيه واخرج هاتفه
المحمول واتصل بالشرطة

وقفت جميلة أمام المرأة تتأمل جسدها الذى بدأ ينبض من جديد عيناها بدأت فى اللمعان مجددا وكأن الزمن لم يمر عليها كأنها فقط كانت نائمه واستيقظت...

ارتدت عبائتها السوداء وخرجت من غرفتها وجدت فتحي جالس أمام التلفاز...

- ايه يا فتحي مطلعطش تلعب ليه

- لسه يا أمه ساعه على معاد الماتش

- بس اوعى يغلبوكم بقى ردت وهى تحمسه

- يغلبونا ايه دا حنا هنقطعهم

- طب خد هاتلك حاجه حلوه قبل الماتش وانا هروح اشترى

شويه حاجات وارجع

ذهب فتحي واشترى الحلوى وجلس يلتهمها انتهت المباراة بفوز

فريق فتحي الذى بدأ فى الرقص والغناء لاستفزاز الفريق الآخر

تطور الأمر لسباب وشتائم من كلا الفريقين ثم تشابك باليدى

ثم سكت الجميع عندما صاح أحدهم موجهها كلامه لفتحي:

- ابقى روح يا دكر شوف أمك اللى مقضياها فى بيت المعلم

سماحة

نظر له فتحي نظرة طفولية ومازالت الابتسامة على وجهه فهو

لم يدرك بعد معنى جملة صديقه

-يعنى ايه يلا؟

-يعنى امى شافتها وحكت لابويا وكل الناس عارفة

تركهم فتحي وركض على البيت يبحث عن أمه فلم يجدها

فركض في اتجاه بيت المعلم سماحة فوجد الباب مغلقا جلس على البسطة أمام الباب منتظرا جلس طويلا حتى شعر بالملل وهم بالذهاب للبيت عله يجد أمه هناك ولكنه تراجع عندما سمع الباب يفتح ورأي أمه وهى تقبله وتودعه..

تسمرت جميلة مكانها عندما رآته ولم تنطق بكلمه ركض فتحي الى البيت ودخل غرفته واغلق على نفسى الباب وجلس يبكى اسرعت جميلة ودخلت تبحث عن دقت عليه الباب..

-فتحي افتح يا حبيبي عاوزه اكلمك

-لم يرد ولكنها سمعت صوته وهو يبكى

-عشان خاطرى يا فتحي افتح الباب

مش عاوز اشوفك يا ريت انتى اللى متى بدل ابويا ...

وقفت للحظات أمام الباب صامتة لا أحد يدرى ماذا جرى فى رأسها مشت بخطوات بطيئه نحو غرفتها واغلقت الباب ورائها ورمت بالمفتاح من الشباك.

مرت دقائق من الصمت قطعها صوت صراخ جميلة قام فتحي مسرعا رأى ضوء النيران من أسفل باب غرفتها وهى تصرخ وتستغيث ركض مسرعا ليفتح الباب لكنه تراجع للوراء وجلس على الأريكة صامتا يستمع لصرخات أمه .

فى أثناء ذلك تسلل صوت آخر من الشرفة... صوتا لطالما أحبه فتحي ... بائع الحلوى بزمارته الشهيرة... قام مسرعا فى اتجاه الشرفة... القى نظرة على عم مصطفى ثم أغلق النافذه مسرعا

قضى سمير النهار كاملا مع ورد ربما ساورته بعض الشكوك في الجنة الموعودة التي تنتظرهما معا فأراد أن يمضى معها يوما مضمونا في هذه الدنيا ..

دعاها لتناول الغداء في مطعم على النيل ظل يراقبها وهى تأكل وتحلم بالمال الذى سيحصلان عليه اليوم وماذا ستفعل به وماذا لو تكررت هذه العملية وحصلا في كل مرة على هذا المبلغ ظلت تتحدث طويلا وهو صامت يراقبها ويبتسم حتى لاحظت سكوته الدائم

-انت مبتدش ليه؟

-بسمعك مبسوط وانا بسمعك

-طب ايه احنا هنفضل قاعدين هنا؟

-تحبى نتمشى شويه

-اه بدل الزهق ده

مشيا سويا بمحازاه النيل وكلما صادفا أحد الباعة اشترى لها هدية حتى امتلئت حقيبتها بالورود والهدايا ..

توقف وأشار لأحد سيارات الأجرة .. جلس بجانبها صامتا أيضاً وما أن وصلا قريبا من الملهى حتى أشار للسائق ...

-على جنب هنا ياسطى وأشار لها بالنزول

-ايه فين الراجل؟

-على وصول يا ورد

-ايه هو هيقابلك في الكباريه ولا ايه؟

- ايوه اجابها بشرود..

-ده مزاجه على اوى وضحكت بصوت على

- تعالى نتمشى شويه لحد ما يجى وجذبها من يدها

أخذا يسيران بهدوء بدون أن يتحدثا حتى أصبحا أمام الملهى مباشرة ... تذكر عندما كان طفلا صغيرا يلعب معها وباقي الأطفال عندما كانت تتشاجر بشدة معهم عندما ينادونه بسمير الأسود وتربت علي كتفه قائلة :

-متزعلش يا سمير أنا بحبك

توقف سمير عن السير فجأة وأمسك يدها بقوة وسألها :

-ورد

- ها أجابته ببرود

-هو انتى مكنش ينفع تحبيني زى زمان؟

-أووف والله انت رايق يا سمير... يا عم نخلص المصلحة دى الأول

وبعدين أبقى أحبك وأموت فيك كمان

-ابتسم ابتسامته الباهته وأمسك يدها بقوة وباليه الأخرى ضغط

على زر التفجير فى حزام حول خصره .

تمت